

焦太史編輯國朝獻徵錄

獻徵錄序

古之良史欲紀一代之事必先
儲其材以俟之龍門蘭臺之史
毋論家有世業緒而成書所取
材于世本國策秦史記與夫中
壘父子東觀諸儒之述作何具

備也近代若豐城之列卿紀琅
琊之弇山別集琬琰錄皆有意
憲章博為之地雖未能如海鹽
之拓徵吾今言為全書然傳諸
執林蔚稱祕典若舉一代王侯
將相賢士大夫山林瓢衲之蹟

巨細畢收毋患堙沒實未有若
澹園先生之獻徵錄者先生天
授異才幾隣殆庶知通聖統上
比素臣自首廷對領史官毅然
思有以自舉其職舍毫相視薄
而不為誠所謂業傳二正才擅

三長者矣會陳文憲公議修

國朝正史與王文肅公共欲以
此事顯畀先生先生謂蓋衆獨
賢固辭不可遂與詞臣分紀其
事然而先生胷中實具有成書
即文憲所建議規畫大氏皆發

端于先生者也于是取

累朝訓錄方國紀志與家乘野
史門分類別採而緝之自

禁中之副名山之藏通都大邑
之傳畢登于簡一代史材犁然
大備茲錄固其一爾當是時使

先生從容

禁林次第筆削日月不刊唾手
可異而為時所忌歸卧東山廣
內之儲匱而在筭豈不惜哉然
先生意不忍忘時為讐校緒成
其業多至百二十卷蓋其目廣

于列卿者什五其人多于琬琰
者什七至析衷是非綜校名實
闕疑而傳其信斥似而采其真
所謂其義則某竊取之先生于
此實有獨鑒異乎徒事網羅靡
所澄汰愛奇好異或濫情實者

矣學士大夫嚮往此書借觀至
于簡渝傳寫為之紙貴乃從友
人茅生之請取畀之梓然每類
間為梓者有所裁避先生意雖
任之而成書具存異日發其大
全固可俟也此錄出而一代之

人材政事如指諸掌覽者資之
為政鑒作者資之為史材如先
生自謂者所裨豈其微哉余嘗
觀古來作者後先相踵史才實
難其人昌黎文起八代之衰至
為順宗實錄何濶略也又以避

袖守默重為柳州所譏眉山寸
氣從橫俯視千古友人用史事
推之以寸非當家遜不敢任退
而處于廬陵之後史之難其人
也如此當吾世而有先生豈非
盛事

國朝之史有專官無專業自會
要輟編木天諸儒不領著作簪
筆紀言

起居章奏而外未有聞也史之
難其書也如此當吾世有先生
而為此書又豈非盛事余誠願

上一日大開金匱石室徵先生
典之緒成正史垂諸萬世執此
以往先生得無意乎即不然而
詔賜筆札錄副

禁中私家所藏褒進為公史如
班書故事固東漢以來作者之

殊邁也昔劉子玄手著史通倚
摘古人不遺餘力至身為史官
以作非一人詒書僚長徒抱汗
青無日之歎如先生與衆共業
退矣而猶思儲一代之史料以
信今傳後人之度量相越不亦

遠哉天下事何不可為也于是
乃益信賢者之有益于人國矣
萬曆丙辰同里晚學顧起元撰

獻徵錄序

夫自虞夏書誥以來龍
門而下涑水而上有一代之
人必有一代之事而勸一代
之史故史以徵事以徵人
夫史非徒侈詞藻誇用見

而已大而國體隱而民瘼賸
而世務殽而材品當時治亂
興衰得失之林誠覆轍標
芳軌于是乎在故曰文武之
政布在方冊史之不可以已
也慨夫士大夫幾之者趣富

貴如騫安事詩書即有逸
倫之姿愛奇矜博注之高
視千古之上迂談六合之外
而問以當代行事典人物材
品高下代謝之數則舌舉
目眦莫能置對闕文殘簡

誰與正之故殷夏之禮亡
杞宋文獻不足孔子所
喟然而嘆也 明興

高皇帝開草昧而經綸
之魏蕩之紫宇宙一新
列聖踵接顯承同條垂三

百年其間綱紀風俗文武
將相內外職司一略與夫林
間之秀方外之逸簇萬
品而雄百代固不在七虞夏
殷周之下而歷世既久長年
晨星最著者如吾學微吾

實而未詳憲章鴻猷略而
不編豐城之列卿紀未萃
羣流弇州之琬琰錄且多
掛漏彼寒俊野老目不窺
金匱石室之藏而一方一技
之士井底闌觀欲其討國

典菟家乘采稗官樵說
林稽故實精鑒裁以勒
成一代全史不亦難乎天
隲斯文弱侯焦先生獨
稟宏才通道道略物兼有
三長遐覽萬古自首對

大廷諸館閣長老舉莫
能出其右歲在甲午會陳
文憲王文肅兩公深知先生以
國朝正史事議請肩荷之
先生稽首三讓不能得因
請與詞林各曹別類諸詞

林有就有否而先生彈日
夜之力取

累朝訓錄及海內碑銘志
狀表傳々屬盡錄之下及
齊諧小說靡不詮擇自曹
公而外並有結撰紀志諸

有玉

編稍：就緒我

明不朽之業且觀厥成矣而
道之喪世王公歸一里陳公
下世緒業未竟而忌才者
至蹟先生成東山之高詎不
痛乎然先生即歸田若而

年不忘其初凡所覩聞僉
命掌記時為續輯自同姓
諸侯王傳文臣武臣以及四
等傳凡百二十餘卷萬有一
千餘葉錄名獻微其蹟談
其幽闡其是非辨而析衷

嚴所謂國體民瘼世務材
品犁然而具明主所與文
武將吏行事之實庶幾無
缺後王法之羣工遵之則
太平之略也名山副之金匱
藏之則良史之材也不其

盛哉嗟乎向使陳王未謝
聖主堅于綱重優以元老
領袖輝光出入中秘澁容
歲月駸歷所至聽以書局
自隨若治平司馬氏之任令
先生得畢其長用左氏編

序七

年法貫串二百餘年之事
而兼史遷之紀傳竊取春
秋之義豈惟史材竟成全
史斯不亦

昭代之大業千秋之永鑑乎
而素何其以東山老也嗟

乎道之不行而託諸史之
不竟而脩之家範國寶
為家珍發藏山於通邑即
後有作者奉為著蔡凜若
衮鉞無能沒先生素臣之
功而使先生抑而就是誰

當其咎蓋想昔人吐握之
風詠緇衣之篇而不能不
為之太息也南儀部郎
武林黃汝亨誤并書

焦太史編輯國朝獻徵錄

總目

卷之一

卷之二

宗室一

宗室二

卷之三

卷之四

戚畹

駙馬都尉

卷之五

卷之六

公一

世封

續封侯

公二

除封
衍聖公

追封

卷之七

卷之八

侯一

世封

侯二

除封

追封

卷之九

卷之十

伯一 世封

伯二 除封 追封

卷之十一

卷之十二

中書省

內閣一

卷之十三

卷之十四

內閣二

內閣三

卷之十五

卷之十六

內閣四

內閣五

卷之十七

卷之十八

內閣六

詹事府一

卷之十九

詹事府二

卷之二十

翰林院一

卷之二十一

翰林院二

卷之二十二

翰林院三

卷之二十三

南翰林院

卷之二十四

吏部一

卷之二十五

吏部二

卷之二十六

吏部三

卷之二十七

南吏部

卷之二十八

戶部一

卷之二十九

戶部二

卷之三十

戶部三

卷之三十一

卷之三十二

南戶部一

南戶部二

卷之三十三

卷之三十四

禮部一

禮部二

卷之三十五

卷之三十六

禮部三

南禮部一

卷之三十七

卷之三十八

南禮部二

兵部一

卷之三十九

卷之四十

兵部二

兵部三

卷之四十一

卷之四十二

兵部四

南兵部一

卷之四十三

卷之四十四

南兵部二

刑部一

卷之四十五

卷之四十六

刑部二

刑部三

卷之四十七

卷之四十八

刑部四

南刑部一

卷之四十九

卷之五十

南刑部二

工部一

卷之五十一

卷之五十二

工部二

南工部一

卷之五十三

卷之五十四

南工部二

都察院一

卷之五十五

卷之五十六

都察院二

都察院三

卷之五十七

卷之五十八

都察院四

都察院五

總鎮

總督

卷之五十九

卷之六十

都察院

六

督餉
漕河

都察院

七

巡撫

卷之六十一

卷之六十二

都察院

八

巡撫

都察院

九

巡撫

卷之六十三

卷之六十四

都察院

十

巡撫

南都察院

卷之六十五

卷之六十六

道御史

南道御史

卷之六十七

卷之六十八

通政司

南通政司

大理寺

卷之六十九

卷之七十

南大理寺

太常寺

南太常寺

卷之七十一

卷之七十二

光祿寺

南光祿寺

太僕寺

南太僕寺

卷之七十三

卷之七十四

國子監

南國子監

卷之七十五

卷之七十六

順天府

應天府

鴻臚寺

南鴻臚寺

卷之七十七

卷之七十八

尚寶司

南尚寶司

太醫院

卷之七十九

卷之八十

欽天監

六科 南六科

卷之八十一

卷之八十二

中書科 行人司
督府幕 錦衣幕

北直隸

卷之八十三

卷之八十四

南直隸

浙江一

卷之八十五

卷之八十六

浙江二

江西一

卷之八十七

卷之八十八

江西二

湖廣一

卷之八十九

卷之九十

湖廣二

福建一

卷之九十一

卷之九十二

福建二

河南一

卷之九十三

卷之九十四

河南二

陝西

卷之九十五

卷之九十六

山東一

山東二

卷之九十七

卷之九十八

山西

四川

卷之九十九

卷之一百

廣東一

廣東二

卷之一百一

卷之一百二

廣西

雲南

卷之一百三

卷之一百四

貴州 附交趾

行太僕寺
鹽運司 苑馬寺

卷之一百五

卷之一百六

藩府僚

左右都督

卷之一百七

卷之一百八

都督同知

都督僉事

卷之一百九

卷之一百十

錦衣衛

都司

卷之一百十一

卷之一百十二

各衛

孝子

卷之一百十三

卷之一百十四

義人

儒林

卷之一百十五

卷之一百十六

藝苑

隱佚

卷之一百十七

卷之一百十八

寺人

釋道

卷之一百十九

卷之一百二十

勝國羣雄

四夷

總目終

焦太史編輯國朝獻徵錄

焦太史編輯國朝獻徵錄卷之一目錄

宗室一

懿文太子

秦王世傳

秦愍王

秦簡王

秦定王

汧陽安裕王

晉王世傳

晉莊王

慶成端順王

西河恭定王

周王世傳

周定王

周憲王

鎮平恭靖王

博平恭裕王

南陵莊裕王

四輔國將軍同

奉國將軍安河

鎮國中尉睦榘

楚王世傳

楚昭王

武岡王

齊庶人

潭王

趙王

魯王世傳

魯靖王

輔國將軍當潰

奉國將軍健根

輔國將軍觀炊

蜀王世傳

蜀獻王

蜀定王

湘王

代王世傳

靈丘榮順王

靈丘端懿王

肅王世傳

肅靖王

遼王世傳

慶王世傳

安化真鑑

寧王世傳

庶人宸濠

寧獻王

寧靖王

弋陽端忠王

樂安端簡王

奉國將軍多煌

奉國將軍拱柝

奉國將軍拱搖

奉國將軍多燧

輔國將軍拱慨

岷王世傳

南渭莊順王

谷庶人

韓王世傳

韓恭王

欽定四庫全書

卷一百一十五

襄陵莊穆王

瀋王世傳

安王世傳

山陰張汝霖

同校

吳興茅元儀

錢塘徐象禎

刊行

目錄終

焦太史編輯國朝獻徵錄卷之一

宗室一

懿文太子傳

鄭曉

懿文太子標母 高皇后元乙未九月生於太平陳
廸家上爲吳王立爲王世子從朱濂受經吳元年年
十三矣 上遣世子及弟謁臨濠墓諭曰世稱商高
宗周成王爲守成令主高宗舊勞於外成王早聞無
逸之訓皆知小民疾苦故其在位勤儉不敢驕逸兒
生長富貴習於宴安今出旁近郡縣遊覽山川經歷
田野因道途險易以知鞍馬勤勞觀小民生業以知

衣食艱難察民情好惡以知風俗美惡卽祖宗所居
訪求父老問吾起兵渡江時事識之於心以知吾創
業不易又命中書省擇官輔行凡所過郡邑城隍山
川之神皆祭以少牢過太平訪廸家賜白金五十兩
至泗濠以上意告祭祖考妣考妣及兄弟墓是冬
從上觀郊壇令左右導之農家徧觀其服食器具又
指道旁荆楚曰古用此爲朴刑以其能去風雖傷不
殺人古人用心仁厚如此兒念之洪武元年正月立
爲皇太子帶刀舍人周宗上書乞教太子 上嘉納
中書省都督府放元制請以太子爲中書令不許曰

兒年未長學未充更事未多宜尊禮師傅習經傳博古通今識達機宜他日軍國務重皆令啓聞何必爲中書令乃選勲德老成舊人動有典則及新進之賢者兼領東宮官於是左丞相善長右丞相達中書平章錄軍國重事遇春兼太子少師少傅少保右都督馮宗異兼右詹事中書平章政事胡廷瑞廖永忠李伯昇兼同知詹事院事中書左右丞趙庸王溥兼副詹事中書叅政楊憲傅獄兼詹事丞同知大都督康茂才張興祖兼左右率府使大都督府副使顧時孫興祖兼同知左右率府事命大都督府事吳楨耿炳

文兼左右率府副使御史大夫愈和兼諭德御史中丞基溢兼贊善大夫治書侍御史文原吉范顯祖兼太子賓客諭之曰朕東宮不別設府僚而以卿等兼領者蓋軍旅未息朕若有事於外必太子監國若設府僚卿等在內事當啓聞太子或聽斷不明與卿等意見不合卿等必謂府僚導之嫌隙易生朕所以特置賓客諭德等官輔成太子德性且選名儒爲之賓客昔周公教成王克詰戎兵召公教康王張皇六師此居安慮危不忘武備蓋繼世之君生長富貴泥於安逸不諳軍旅一有緩急罔知所措二公所言不可

夏大
澤堂

忘也是年 上命選國子生國琦王璞張傑等十餘人侍讀書禁中琦等入對謹身殿姿狀明秀應對詳雅上喜因謂殿中侍御史安慶儒士郭淵友等曰吾觀諸生於文藝素習矣然與太子處當端其心術養其德性庶不流於浮靡太子之德亦當有助因厚賜之未幾以梁貞王儀爲太子賓客秦鏞盧德明張昌爲太子諭德先是建大本堂取古今圖籍充其中徵四方名儒教太子諸王分番夜直選才俊之士充伴讀 上時時賜宴賦詩商確古今評論文字無虛日命諸儒作鍾山龍蟠賦置酒歡甚又自作時雪賦賜

東宮官服令三師賓客諭德朝賀東宮東宮各拜二
三年命東宮及王府官編輯經史古人行事可爲鑒
戒者訓諭太子諸王四年春製大本堂玉記賜太子
十年六月令自今政事並啓太子處分後奏聞因諭
曰人君治天下一日萬幾自古創業之君歷涉勤勞
達人情周物理故處事咸當守成之君生長富貴若
非平昔練達少有不繆者故吾特命爾日臨羣臣聽
斷諸司啓事以練習國政惟仁不失於疎暴惟明不
惑於邪佞惟勤不溺於安逸惟斷不牽於文法凡此
皆心爲權度凡人雖有明敏之資自非歷練臨事率

命儒臣爲太子講學
太子講學
太子講學
太子講學
太子講學

意而行未免有失知悔而改亦已晚矣吾自有天下
以來未嘗暇逸於諸事務惟恐毫髮失當以負上天
付託之意戴星而朝夜分而寢爾所親見爾能體而
行之天下之福吾無憂矣時令儒臣爲太子講太學
衍義二十二年置詹事院上諭吏部侍郎戾庸曰輔
導太子必得忠正賢良之士以兵部尚書唐鐸兼詹
事二十四年八月勅太子巡撫陝西上意欲都陝西
遣太子相宅也既行使諭曰爾自幼至長未嘗遠出
今命爾巡行陝西方渡江天道赫然有變雷起東南
爾征西北以造化言之雷天威也爾前行雷後從威

震之兆也然一旬之間久陰不雨占法主陰謀事爾
宜慎舉動節飲食嚴宿衛親君子遠小人務在存心
養性施仁布惠以回天意雷之嘉兆未可恃也爾其
慎之比還獻陝西圖遂病病中上言經略建都事二
十五年四月丙子卒上慟哭命禮官議喪禮戊寅
上御東角門召諭廷臣吾老矣太子不幸命也大哭
而退旣公除上不忍禮官請之始鳴鐘鼓朝京耆
老上香慟哭上亦哭諭曰爾念太子意良厚顧農
事方興諸父善勤生亟歸勿失時諸未至者諭朕此
意八月庚申祔葬孝陵東謚懿文冊曰朕惟先王之

與生既有名歿必有諡名所以彰德諡所以表行故
行有大小則諡有重輕此古今通義雖在至親不敢
廢也爾皇太子標居位二十有五年分理庶政裨贊
弘多今焉永逝特遵古典從公議賜爾諡曰懿文嗚
呼德以名彰行因諡顯公論所在朕何敢私建文元
年追尊爲孝康皇帝廟號興宗靖難後復稱懿文皇
太子太子元配常氏開平王女太子旣立上念王
有大功早卒遂冊其女爲皇太子妃先太子數年卒
諡懿敬建文君卽位追尊爲孝康皇后靖難復稱懿
敬皇太子妃太子繼妃呂氏生建文君妃父本壽州

人仕元爲元帥府都事丙午歸附爲中書掾史累官
吏禮二部尚書出爲都轉運鹽使終太常卿本無子
洪武中卒建文君卽位尊妃爲皇太后靖難兵入金
川門遣人迂太后太后至 成祖述不得已起兵之
故太后還未入宮宮中火起建文君遜去建文四年
七月隨其子敷惠王允熙居太子陵

吾學編

秦王傳

鄭曉

秦王桀洪武三年年十五受封二十三而之國西安
初聘元河南王王保保女弟繼妃寧河王女也王生
而岐嶷嚴毅英武上委以關西兵事得專行賞罰
歲秋巡邊大將皆聽節制御軍整肅所過秋毫無犯
未嘗妄戮一人二十七年征降西番賜璽書賞賚萬
計時露宿山野遭疾尋卒在位二十七年年四十
上命禮部尚書任亨太定喪禮謚愍愍王六十長尚
炳二十八年嗣在位十八年卒謚隱次永興簡懿王
尚烈保安懷僖王尚煜興平恭簡王尚府永壽懷簡

王尚烜安定王尚炆尚炳子志垣永樂十年嗣在位
十三年卒謚僖無子庶兄志均永樂二十二年以渭
南王進封王請長興侯故宅處諸弟又請選良家女
入宮令擇護士家女酬直勿抑勒在位三年卒謚懷
妃張氏未婚而寡宣德元年令入宮守王服無子弟
志潔宣德三年以富平王進封王四年坐罪辭三護
衛在位二十八年卒謚康志塽宜川莊靖王也康王
五子長公錫天順二年以秦世子嗣在位二十九年
卒王好文睦族知禮謚惠公鍵未封卒公銘臨潼惠
簡王嘉靖十七年以孫秉機嗣王追封秦安王公鏗

邵陽惠恭王公鎰汧陽端懿王惠王四子長誠泳成
化四年以鎮安王嗣在位十一年卒王好書崇儉有
禮謚簡誠滄誠河誠淖皆未封簡王無子安王六子
誠深嗣臨潼王謚和僖嘉靖十七年以子秉機嗣王
追封秦莊王誠潤誠浩誠澈誠波誠注皆鎮國將軍
莊王二子秉機以嗣臨潼王弘治十三年封王在位
二年卒謚昭昭王三子長惟燁正德四年嗣次惟燁
次未名王請潼關以西鳳翔以東河壩地曰皇祖
以賜臣先王挾也戶部尚書梁材執議曰陝西外供
三鎮內給四王民困已極視國初生產物力千萬不

作豈得空地更給諸王 上從材言不許王早失父
母育於簡王妃廖氏廖妃卒王喪如禮事其生母蕭
妃孝謹守臣以王謹身脩行聞遣勅使持幣旌王嘉
靖二十年上黃金千兩白金萬兩助建宗廟 上喜
加祿歲二百石贈玉帶一

吾學編

二十三年卒謚定

無子安王庶一子鎮國將軍誠潤卒追封臨潼王子
鎮國將軍秉柎亦卒子奉國將軍惟嫌子鎮國中尉
懷堧奉 勅主喪理府事堧乞讓父 世宗允其請
後禮官謂堧以姪承叔居內奉嬭天序人情無往不
順嫌以兄繼弟殊有未安遂罷嫌歸第尋卒堧二十

七年進封嗣贈曾祖恭王祖順王父端王四十五年卒子敬鎔封隆德王隆慶三年嗣萬曆四年卒謚

承休王子寅
枝經整篇

秦愍王

諱模乃太祖高皇帝嫡第二子洪武三年始封爲

秦王洪武十一年四月十一日之國陝西洪武二

十八年薨謚曰愍王嚴毅英武高皇帝命以關

西軍事得專刑賞歲時躬巡邊塞自大將軍以降皆

屬節制有軍功者先擬拜封然後以聞御軍嚴甚所

過秋毫無敢犯然未嘗妄戮一人故戎狄咸畏軍兵

倚以爲重洪武二十七年西藩負固弗庭王奉命
征之多所擒獲番首窮迫率其衆詣仗下降遂受約
束朝貢至於今不絕當出兵時多露宿山野因邁瘴
癘力疾破賊而還捷聞聖書嘉獎賞賚以億萬計
越明年薨

秦簡王

諱誠泳乃惠王庶第一子弘治元年襲封弘治十
一年薨謚曰簡王少卽知檢長自矜持非法不服
非禮不蹈言雖小必踐行雖小必謹聲色歌舞貨利
畋獵澹然無所好刑于之化洽於賢妃恭敬惠慈以

仁逮下宗室之化自郡王而下至於將軍中尉不問
尊卑族屬皆循矩蹈矐不敢以非義聞於其側蒞廟
社祀事必恪接臣僚有禮御下甚寬人有小過務爲
包含觸法抵禁付之有司不輕有假貸自奉儉素居
常布衣蔬食有患孤苦施予無吝秦川數百里多
欽賜府地軍民佃以爲業天時小歉輒減租稅之半
或盡蠲之喜接文儒士夫話談竟日亹亹忘勞凡異
端曲士攜術以干者卒無所售喜讀書凡六經子史
百家無不徧閱一日悉記善作詩每遇花辰燈夕請
藩臬及關中縉紳宴飲賡和有經進小鳴稿行於世

長安有魯齋書院久廢弘治丙辰提學遼菴楊公欲復之故址半爲民居王聞乃易隙地一區建正學書院既成爲文記之又於府西建立小學凡軍校子弟之秀者命文臣教之嘗自課試有益者送有司考入庠由是科不乏人

王府護衛子弟得入貴官自秦簡王始

朱謀埠藩獻志

秦定王

諱惟焯乃昭王庶第一子正德四年襲封嘉靖二十三年薨謚曰定王少失怙依祖母簡王妃廖氏撫育成立王性淳篤不尚浮華服膳恒儉素若韋

布嘗言君恩莫報每詰旦焚香望闕祝曰壽與天
齊永爲萬邦主鞠躬舞蹈若對天顏事祖母廖
氏盡色養晨昏定省必恭謹事無大小請命後行節
朔禮宴綰紳儀度閒雅不輕言笑諸縉紳敬之生平
循理樂善脩古右文先是關中故無史記王乃求善
本刊之成趣軒中俾學士家便觀焉卽東平何讓侍
衛子弟選其俊秀者乃設學陶育之故人才奮起不
乏科第優恤軍校耆幼者蠲其賦周人之急助人之
喪惟恐不及大旱王齋沐禱於神甘霖卽霽越歲再
不雨禱輒應其積誠動神如此王有玉緙鈎素佩而

珍愛者侍從誤墜地而毀衆侍驚怖王曰數也竟不
收容亦不言侍從過嘉靖十九年巡撫都御史趙廷
瑞巡按御史張光祖遵 詔上其行奉 世宗肅皇
帝勅諭旌之仍命有司建坊牌於靈星門扁曰忠孝
尚義賢德著聞

汧陽安裕王誠洲

汧陽安裕王誠洲秦康王諸孫也事父端懿王暨繼
母以孝聞視寢問安晨夕不息弘治乙卯端懿王
甚王衣不解帶食不變味湯藥必親嘗而後進之每
夜稽首北辰乞以身代端懿王枕塊寢苦盡斷酒

肉雖醢醬鹽酪不入口將葬霖雨王禱之而霽葬已
霖復大作明年墓上嘉禾生一本雙穗嘉瓜二實共
蒂所植墓樹挺秀不萎慈烏異鳥環集其間王克喪
衰麻不去身獨處齋室以毋馬妃早薨不逮已養追
服蔬食者復三年弘治辛酉冬雪中萱草有華人感
謂孝感所致王爲長子時娶夫人王氏先卒遂不再
娶泰定王以王孝行 上聞弘治十五年 賜勅嘉
獎

晉王傳

晉王桐年十三受封又七年之國太原已而得罪廢懿文太子調護得還洪武三十年卒謚恭世子濟熿嗣靖難後封濟熿弟濟熿平陽王濟炫慶成王濟熿子美圭封晉世子濟熿狠戾失愛憾其父并憾濟熿不爲解喉慶成諸王日訴濟熿過於朝又誘府中官校誣濟熿罪竟奪熿爵并廢美圭爲庶人守恭王園濟熿遂得嗣王益驕橫百方幽苦濟熿父子恭王有老嫗不能平走訴文皇立召獄中晉府承奉左徵問之盡知濟熿構濟熿狀卽釋徵馳驛召濟熿父子

時濟煇囚空室已十年左徵者濟煥嘗言其佐濟煇
爲逆逮治京師府中言徵久死矣徵至一府大驚徵
入空室解濟煇縲紲相抱持大慟濟煥自是怨望出
悖語濟煇父子見上行在所濟煇病憊甚上見
之惻然不直濟煥遂封美圭爲平陽王俾奉父居平
陽恭王故有田在連伯灘文皇與美圭矣濟煥奪
不與圭聞上仁宗再三諭濟煥還美圭不從美圭
言連伯灘地隸平陽不隸太原因及曩誣構事仁
宗遣人視灘果隸平陽又書諭濟煥美圭父子困頓
累年詩曰脊令在原兄弟急難每用吟咏感念無已

緬惟賢弟同吾此心又書諭美圭朕諭晉王讓汝田
兄弟叔姪本同一氣姪事叔益恭愛久當憐汝濟煥
得書又聞 朝廷賜濟煥王冠服遂廣致妖巫府中
造呪咀事 仁宗崩又不服喪 宣宗卽位憐濟煥
父子時時問勞濟煥呪咀事益露踪跡自度罪不可
解遣人結高煦謀不軌日夜造兵器寧化王濟煥告
變 上曰勿洩擒高煦又得濟煥與交通書 上又
曰勿洩濟煥固自知益反側不安其所遣詣高煦人
又走 京師首服內使劉信又奏濟煥擅取屯糧十
餘萬石給護軍欲反應高煦并呪咀事寧化王又言

濟熿毒弑其母濟熿始懼辭王爵及護衛不聽遺書
及勅符召濟熿至示以諸所發奸逆狀濟熿伏地頓
首言臣罪萬死 上書諭諸王去歲高煦反罪人既
得奸黨人皆言趙晉二王實與謀予未忍信今晉府
人累上告變徐察之有驗不誣趙王自知事不可掩
已辭護衛濟熿得罪 宗社不敢以私親廢大義謹
遵 祖訓免爲庶人屏之鳳陽誅其同謀及妖巫數
人恭王妃在晉府者令美圭迎平陽奉養復濟熿晉
王卒謚定美圭正統初嗣王卒謚憲子鍾鉉嗣卒謚
莊奇源世子未嗣卒以孫嗣王贈晉靖王靖王子表

榮世孫未嗣王卒以子嗣王贈晉懷王懷王知焯以
世曾孫嗣卒謚端姪新塿以新化王庶長子嗣王新
化王者晉靖王次子表櫟也謚恭裕恭裕王子端和
王知焯端和王二子新塿新嶠端和王卒晉王請端
和王庶長子新塿嗣新化王未封而晉王卒無子晉
靖王庶子榮澤王表櫟與新化諸王皆晉王叔兄弟
也曰嗣王者非新塿卽新嶠然皆幼攝府事則我長
晉王妃王氏曰晉王無後次及新化王新化王父子
卒有孫新塿在也卽召入府拜几筵爲後行喪榮澤
王忿我叔父行顧不得王新塿端和王長子長子不

得爲人後新塹宜嗣新化王新塹嗣晉王禮也疏下
禮部議新塹宜嗣晉王俟服闋請封又言制親王絕
郡王以序繼親王爵其郡王不得復請繼封次子止
封鎮國將軍新塹得嗣晉王贈父晉康王吾學編
王年老有疾無子萬曆二年請以鎮國將軍新塹子
輔國將軍慎鏡爲嗣上允入府侍湯藥承休王長
子寅枝繩繫錄

晉莊王鍾鉉

晉莊王鍾鉉憲王之子高皇帝曾孫也正統七年
以榆社王進封弘治十五年薨在位六十一年壽七

刻寶
寶堂
法帖

十五王好博古喜法書嘗以終帖歲久斷脫令世子
奇源采舊所藏古今名人墨跡摹刻以傳彌寶賢堂
集古法帖弘治九年表上之 孝宗賜勅嘉獎世子
世孫皆先卒世曾孫如烱嗣位是爲端王端王亦好
文雅嘗校漢文選唐文粹宋文鑑暨 世宗御製敬
一歲雕梓進 覽嘉靖八年上之賜勅勉以經學事
嫡母郝妃生母彭氏夫人以孝謹聞母妃薨慟幾
絕執喪盡禮有素芝產寢宮中白鷗盤王所止撫臣
上其事 賜勅獎諭

慶成端順王奇湏

武徵錄

卷之十

十五

慶成端順王奇渢晉恭王玄孫也弘治十二年襲爵
正德中以賢孝聞 賜勅褒獎嘉靖十一年薨子表
樂嗣爵是爲恭裕王王樸茂寡言篤於孝友好文謹
度譽動國中嘉靖三十年冬王壽八十撫臣王崇上
疏乞旌表詔賜書嘉獎資以金幣尚書王瓊嘉靖初
上言慶成王生子七十人吳郡王世貞著 皇明盛
事述稱慶成王生百子長封王餘九十九人並鎮國
將軍每會紫王盈坐至不能相識而人皆隆準極異
事也考其世蓋端順王云

西河恭定王奇溯

孝感
附錄

西河恭定王奇溯晉定王之曾孫也父順簡王方王
歲稍稍長問父所在不得卽知痛哭刻旃檀爲順簡
像祀之母葉夫人嘗病渴中王稽顙禱天俄有甘泉
自地涌出夫人飲泉病良已母卒哀毀骨立宮墀古
栢忽生奇花兩頭異香襲人嘉靖三十六年壽七十
有六薨子表相嗣爵亦以孝聞

俱舊志

輔國將軍奇添慶成靖恭王之孫也娶夫人王氏而
添早卒夫人奉姑毓子備嘗勞瘁孀居六十餘年逮
見孫曾四世嘉靖三十九年五月山西撫按疏其節
孝乞賜旌表從之時年八十矣恭人賀氏慶成鎮國

中尉知熈配也嘉靖三十七年春知熈病甚恭人極意侍左右知不可起欲先死以殉雉經焉侍兒救而止尋取湏一勺咽之左右復救奪恭人曰湏毒人臟腑無可救理卽可救亦復尋死遂閉口絕食飲竟與其夫同時卒慶成王表樂以聞請賜旌表禮官按典故無旌命婦例世宗皇帝嘉其節特許旌之謚曰貞烈恭人

周王傳

周王橚秦晉二王皆高皇后子周王育於孫貴妃
妃卒服以慈母斬衰三年主喪事洪武三年封吳王
國錢塘工部尚書張允請建諸王府上曰吳府且
勿建七年置杭護衛上以浙江財賦地不可封王
罷護衛十一年改封周王國開封府卽宋故宮爲府
二十二年王棄其國來鳳陽遷之雲南未行還原國
建文中人告王反建文君命曹國公卽訊景隆大索
金寶王不能應坐王反王至京窺雲南諸子並別流
放已而召還南京靖難兵入金川門王與齊王見

成祖且拜且哭因並轡行登樓相慰又哭遂得復封
王加祿五千石以開封圯於河改建邱洛陽已而又
還開封封其長子有燉爲周世子有勲汝南王有烜
順陽王有燭祥符王有熺新安王有光永寧王有燭
汝陽王有燠鎮平王有熈宜陽王永樂二年來朝獻
騶虞八年請祀太祖國中上書論支子不得祭
太祖王國祖始封之君不許已而數有過上輒
赦不問有告王反者遣都御史王彰諭意王大懼上
還護衛仁宗卽位加祿五千石通前二萬石卒謚
定子有燁嗣宣德元年王請詣闕謝諸弟封不許

正弟汝南王有勲數誣王 上爲書諭王先是有勲
與有熹素惡有熹爲與趙王書刻祥符王印記封議
置彰德城外道傍都指揮王友得書聞上 宣宗疑
有離間逮友訊無迹召有熹至曰必有勲也爲此書
者又名有勲訊服詞連有熹有勲志行故不臧少與
高煦善建文中嘗告父定王反定王竟囚繫除國靖
難後始釋遂乞誅有勲 上遣有勲去雲南居大理
後定王老始歸河南有熹喜生食人腦肝膽薄寐每
伺人過門輒誘入殺而食之以故其邸前日未晡卽
斷行迹 宣宗惡有勲有熹免爲庶人畱有熹居京

師已復爵有燉卒謚憲弟祥符王有燭嗣景泰三年
卒謚簡子世子子垕嗣卒謚靖無子弟通許王子墜
嗣卒謚懿子同鑣嗣卒謚惠子安潢世子卒以子睦
椿嗣贈周悼王睦椿卒謚恭世子勤熄未嗣卒世孫
朝垌迎 駕加祿歲三百石贈金幣嘉靖十八年嗣
王二十一年巡撫魏有本上言河南諸宗人缺祿米
三百萬石諸將軍安溜等五百人譁推行臺門凌逼
撫臣安溜坐革爲庶人二十一年王及宗人獻白金
六千兩助修 太廟賜玉帶一圍衣一稱

吾學編

三十年卒謚莊子鈺嗣四十二年生嫡子肅泰隆慶

六年封世子

藩獻志

周定王

周定王諱櫟

高皇帝第五子始封吳王洪武十一

年改封周王國開封建文中以猜忌大藩竄王雲南

成祖靖難得復爵永樂二年獻頌九章及佾舞王

與文皇帝同母

高皇后特見友愛歲時問遺不

絕嘗以汴梁患河水將爲王營宮洛陽永樂三年王

上書言汴梁水去隄防稍固第乞修舊宮以居免勞

民力上善之遂罷洛陽役六年王遣儀賓春進野

蠶繭永樂十四年上疏辭所賜在城稅課十九年春

錄徵錄

兩卷之一

十九

以奄三告王不軌召至京師王遂奏納三護衛而還
洪熙元年薨王嘗以國土夷曠庶草蕃廡多可佐饑
饉乃購諸田夫野老得甲坼勾萌之物四百餘種植
圃中躬自辨別察其滋長成熟繪圖而注疏之作救
荒本草四卷博物者資焉王之子十有五人皆襲珪
組受茅祚今周藩衆爵五千有奇視他邦獨盛論者
以爲定王宅心仁惠功造本草有以昌其後葉耳世
子有燉嗣立是爲憲王

周憲王有燉

周憲王恭謹好文辭兼工書畫著誠齋錄樂府傳奇

若干卷又集古名蹟十卷手自摹臨勒石名東書堂
集古法帖適麗可觀所製樂府新聲大梁人至今歌
舞之正統四年薨無子妃韋氏暨牛戴韓歐陳李六
夫人同日自經以殉 詔謚妃貞烈六夫人貞順附
葬憲園弟有燭以祥符王進封爲簡王

鎮平恭靖王有燭

鎮平恭靖王有燭周定王第八子也母周夫人建文
庚辰八月生王於雲南蒙化 文皇帝卽位復定王
封王方數歲封鎮平王稍長嗜學工吟咏兼通書畫
凡騎射鞠戲諸伎藝靡所不習嘗讀中庸默有悟解

作道統論幾萬言又采歷代公族賢者自夏五子迄
金元百餘人作賢王傳若干卷著德善齋詩集菊園
譜壽七十三薨子榮莊王子堦嗣

博平恭裕王安洊

博平恭裕王安洊周惠王第十三子惠王之子二十
五人而恭裕獨以文雅得譽嘗修東書堂法帖輯貽
後錄養正錄錦囊詩對諸書勤於治生田園僮奴車
馬甚具以故遊豪貴致賓客縉紳載筆之士自遠慕
義鮮不日造其門王傾已延納之其時次第名德者
必首曰博平博平云

南陵莊裕王睦模

南陵莊裕王睦模周悼王第九子也好文雅敏達有識嘉靖四十一年冬御史林潤上書言天下財賦歲供京師米計四百萬石而各藩祿至八百五十三萬石山西河南存留米二百三十六萬三千石而宗室祿米至五百四萬石卽無災傷蠲免歲輸亦不足以供宗祿之半年復一年愈加蕃衍勢窮弊極將何以足支請令廷臣公議覘勢會通以垂萬世之利事下諸王計議明年冬王條上七議請立宗學以崇德教設選科以省祿費嚴保勘以杜冒濫革冗職以除素

餐戒奔競以息饕貪准拜掃以廣孝思立憂制以省
祿費 詔下廷臣叅酌之其後諸藩遂稍稍陳說利
病尚書李春芳集而上焉乃頒宗藩條例王薨無子
爵除

鄆陵四輔國將軍同

四輔國將軍同鄆陵 安僖王孫也 安僖王四子
四曰某封鎮國將軍鎮國亦四子四者四輔國十歲
以例封祿歲八百石貴矣然純慎不以地高人而好
詩書樂與衣冠徒遊嘗讀前史覽功名之會輒撫卷
慨然而歎曰嗟誠使某備一官更生普鼎敢多吾哉

又見豪貴人千金飾狗馬衣裘聚名妹罔費惜及義
施顧一錢忍弗能與則又歎曰雙火一膏兩斤獨木
是速滅之道耳且貧富命也孰有義而損者邪於是
婚喪弗舉者輔國見之輒與鴛酒或棺人曰輔國壽
揆厥心行永之占也居無何輔國病殂矣年四十一
耳於是豪貴人反以輔國爲口實相語匪火自焚匪
斤自槌

俱藩獻志

勅賜崇孝祠碑奉國將軍安河 張時微

國朝以孝治天下風行方域烝烝乎乂哉于時肺腑
之藩罔不灑濯以承休德而奉國崑崙公則尤黠黠
篤詰云此非獨蒞芷之薰也要亦性靈淑懿有以本
之者焉公諱安河字應清 高皇帝六世孫而周定
王之裔也定王生鎮平恭靖王恭靖王生鎮國將軍
子圻子圻生輔國將軍同韓娶夫人賈氏而公則其
長嫡也方生適新作之門輔國莖之曰高門有亢龍
曜其祥翼翼將將其令其昌斯殆不嗟而光者乎粹
而示之百物目屬者頃之左執易右秉豆諸麗好無

以易也卽嬰時不戲狎稍長受書於外傳卽記卽解
旁通子史百家言曰吾以代狗馬毬博之娛耳賈夫
人素多病病則左右日夜侍衣不弛帶目不交睫至
嘗溷以驗差否不愈則刲股和糜以進凡若此蓋不
可殫而述也比卒痛毀骨立蔬食水飲者終三年不
一履於燕室時輔國倦勤勅斷家事惟讀書驩賓客
自喜而公養志無方購圖史作園亭延四方之遊日
夕燕嬉以爲快已而輔國病風展轉床褥公侍之一
如侍賈夫人勞悴百至矣旣差而興有烏數千翔繞
於庭久之不去人謂孝所感也於時宗屬白其事於

周王轉疏以聞撫按官相繼上書闕下 肅皇帝嘉

之遣行人齎璽書旌焉嘉靖辛酉公乃不祿周王奏
曰伏見奉國將軍安河性資醇謹孝友夙成以居喪
則類乎羔柴以養志則合於曾子諸凡懿誠語在臣
等奏旌孝行疏中今各郡府宗室儀賓暨內外輔導
官合詞具啓乞轉奏立祠表揚及據伊男鎮國中尉
睦樺啓稱故父平生慎約纖芥不敢瀆官擾民儻微
天之靈蒙聖慈俞允俾樺得自建祠上以對揚昭代
之彝典下以不拂先人之夙心則先人死且不朽樺
亦死不朽各啓至臣臣目擊盛美何敢蔽賢輒冒昧

以聞皇帝若曰嘻休哉宗賢篤厲至行亢人道之紀
匪祿爵是勸惟德攸勸余一人丕用嘉悅其允王所
請賜祠額曰崇孝命旣下睦懌乃相土景卜鳩工蒔
事而其地適包孝肅于肅愍二祠之中德隣不孤蓋
若天所授云祠爲勅諭亭若干楹碑亭若干楹堂若
干楹門若干楹若厨庫齋涵之所畢具稱備矣中尉
君乃不遠數千里徵文於余余不佞嘗讀歷代諸侯
王傳而有感焉若河間東平之風卓乎不可尚矣自
餘或以驕縱殺身或以奢淫殄世其始意蓋謂社狐
之不可灌屋巖之不可薰耳至一犯吏議有司得執

文法相責訊不必郅都之爲中尉而禍始酷也若中山靖王勝之奏討至今讀之猶爲酸鼻焉今奉國崑崙公無所勸而爲善無所創而不爲不善諸細小不論乃其惇百行之首作範族服受一人之策天章屢頒宣茂實而流景譽豈其微哉公子六人長卽西亭君睦棹次睦杲睦誦睦棣睦樹睦榮俱封鎮國中尉咸世厥德而睦棹尤以經術行誼推於縉紳公之卒也盡以先業讓諸父昆弟而睦棹亦以父業讓諸母弟繩武象賢蓋古今所罕儷云詩曰孝子不匱永錫爾類其崑崙公之謂乎又曰牧誨爾子式穀似之其

西亭君之謂乎

明周藩宗正鎮國中尉西亭公神道碑

張一桂

萬曆丙戌秋七月戊午宗正西亭公以疾卒於邸第
年七十矣其門下士鎮國中尉睦耒等走兩臺頌公
功德者五百人督撫衷公直指徐公疏聞於朝請
祭葬賜諡爲宗盟勸天子震悼下宗伯議如兩臺
言制若曰睦樸學行素優其加祭給水衡金錢共
葬事蓋異數也語稱得全全昌公庶幾無憾者而縉
紳大夫若士民猶環顧咨嗟而歎曰天胡不憖遺令
公百歲也則又曰疇復有閱覽博物其聲藝苑如公

者乎公妊十四月而生有貴徵少端穎朗詣李公獻
吉一見大奇之曰此飛兔也老夫且瞠乎絕塵矣稍
長學無所不闕劇意古作者與閩王道思越陳約之
結社講藝甚驩所結撰出無經而走縣宇執牛耳詞
壇者五十年如一日也則又曰疇復有闡明經術羽
翼聖真如公者乎公初工制義已歎曰揚雄非醇儒
也猶恥繡繁輓爲名高乃覃精於經學當是時衛君
聘名能易和太芳名能書周伯昌名能詩周涿之名
能春秋許守謙名能禮此數先生者皆河洛間宿儒
也公先後從之遊蓋年二十通五經而尤邃於易春

秋其學不顓守師說聚漢以來諸傳注日夜緝究務求不詭於聖人謂春秋非獨爲攘夷復讐立案也乃自爲傳以明筆削之旨易初主王弼後復取鄭玄謂鄭學莫備於唐李鼎祚因刻其集解以傳高陵呂仲木仲梁與公講易東陂上驚曰子輔流也新鄭高公問易之大義云何公以退對高公悅然有問曰四聖之精蘊備是矣其爲名碩所推許如此則又曰疇復有肫肫孝友內行修潔如公者乎公幼有至性事父崑崙公晨昏不離側疾則嘗便額天斬代者數矣喪三年居於外有弟五皆從公受經先世產盡推遺

之立祭田於白塔原歲時伏臘必合族祀先祠下退
燕於寢以爲常卽諸儒習禮家亦自謂弗及也則又
曰疇復有馴行好修蟬蛻塵埃之表如公者乎梁緣
信陵遺風諸王孫不養雞而鬪則從毛薛把臂爲豪
舉耳公生貴年十五封鎮國中尉受世祿顧皜然不
滓被服如儒生海內藏書家推江都葛氏章丘李氏
公盡購得之起萬卷堂日諷誦其中居恒以道德爲
膏粱以禮藝爲園圃一切芬華聲色之好視猶土苴
也則又曰疇復有裒輟經濟明習當世務如公者乎
嘉靖中大盜陷歸德掠諸邑兩河震恐中丞衡水楊

公訪於公公借著圖方略調兵食已次第條上數事
楊公從其策賊遂平復懼株連者衆請楊公毋以大
逆聞又從之所全活者幾萬人楊公悉公才可大用
援祖訓薦於朝格不報中丞章公將改黃河偕公
行視其可否公徐曰河鑿而南且入泗得無爲皇
陵虞乎章公愕而止未幾河決將灌大梁章公督塞
終日水益急公載緡錢牛酒往勞之因說以及水所
未觸闕地樹木捷土石築焉河立塞其他諸公過而
抵掌促膝所裨益者固更僕未易詳矣則又曰時復
有躬躬自牧折節賢士大夫如公者乎公名益重遊

道益廣座客常滿客擔簦造門率館穀之馮軾結制
過梁者必傾蓋造公其或未至亦千里定交竿牘問
訊無虛日若歷下李于鱗吳郡王元美蜀張肖甫楚
吳尚卿越徐子與汝南張助甫皆操風雅權睥睨一
世而皆與公稱莫逆相引重云則又曰疇復有循循
善誘篤老不倦如公者乎初宗學建 詔博求可爲
宗人師表者中外咸推穀公遂拜宗正之 命蓋又
六年宗學成而公始視事念身爲大藩祭酒感奮圖
報稱布功令嚴科條擇諸生秀敏者占一藝講授以
時於是絃誦之聲徹於朱戶斷斷如也癸未夏宗祿

之議起公議不合遂引疾乞休 上以篤行傳聞

畱之不允丙戌再疏申前請復勉畱不允公益感奮

圖所爲報稱者而疾作矣病中猶强起著周乘訓勅

門弟子如平時豈所謂任重道遠斃而後已者歟已

復咨嗟歎曰天胡不憖遺令公百歲也蓋公旣寡嗜

欲而又善養生家言丹顏黃髮人方望之如魯靈光

巋然常存何論百歲也而今已矣則豈惟縉紳大夫

士民哉蓋天下共惜之公所著經學有五經稽疑授

經圖雜著則陂上集中州人物志忠臣烈女傳 大

明帝系周國世系遜國紀纂中州文獻志訓林河南

通志周乘開封郡志共若干卷行於世卒之再踰年
戊子冢嗣勤羹卜以十一月十一日葬公白塔之原
業已乞衷公銘諸墓而屬余以隧道之石曰先志也
余旣感公高誼而重冢嗣請不可以譊譊辭按狀公
字灌甫學者稱西亭先生晚築精舍城東陂上又自
號東陂居士卽與呂仲木講易處也父奉國將軍豫
齋公同鎡輔國父曰鎮國將軍子圻鎮國父曰 鎮
平恭靖王恭靖王者 高皇帝孫 周定王少子也
蓋以文行嬪其家者數世而大昌於公配恭人梁氏
蘇氏俱先公卒繼李氏丈夫子一卽勤羹封輔國中

尉有父風蘇恭人出娶李氏封宜人女子二長適金
吾指揮袁學端蚤卒次塲孫男子一朝越未聘孫女
于一許字劉耀祖 明興周宗最盛翩翩多文藻若
倡明經術者自公始稽古禮文二百年而有宗學膺
其任者亦自公始乃譚者率謂公今之劉向較其用
不用以爲恨夫向誠用矣顧其言枘鑿不相入卒弗
獲如公之爲宗正而坎塲竟其身公則乘時受任舉
生平所醞籍者究宣之而始終恩禮爲極備向用而
不能行其言公不用而能行其學人或知向用之爲
不用而未知公不用之爲用也寧以此易彼哉第易

名之典羣情若歆然望於太常者夫謚法不有道德
博聞勤學好問爲文者乎又不有純行不爽一德不
懈爲定爲簡者乎竊觀 天子所褒嘉公者非一不
曰篤行博聞則曰學行素優在公爲不用之用在
天子爲不謚之謚華袞一言不朽千載矣公卽弗百
歲何歎也系以銘曰 大明中天泱泱嵩河爲周賜
履爰有鎮平世德作求奕葉濟美公平嶽降嫿節樹
惇學探宛委載道者經異說焚如經殘教弛公折其
衷譬彼登岱羣山剡施 帝選於衆詢謀僉同以教
胄子若金作冶若器作型譽髦多士多士伊何習易

奇袤文羞骭骹狂瀾東奔誰其挽之緊公是恃公曰
老矣乞臣之身知足知止 帝曰休哉汝予宗老汝
其彊起偶罹霜露何恙不疼忽焉脫躡輟相罷春人
苟可贖百身其以公澤在後公學在經公行在史誰
能長生死而不朽是謂不死溫明博秘題湊黃腸哀
榮終始佳城鬱鬱我碑其豐詔千萬祀

楚王傳

楚王楨母胡充妃甲辰年生七年而封國武昌永樂元年世子孟烷市人河南諭世子世子來朝請葺府邸諭俟有年三年上出鐵牌開武昌城門都司聞上不許卒謚昭孟烷嗣宣德元年發楚魯二王護兵各千人征安南王請湖廣都司給護兵器五年有告王者乞減護衛三之二王宮火焚譜系符勅更給之卒謚莊季塊嗣卒謚康弟季淑嗣卒謚憲子均銳嗣卒謚靖子榮滅正德七年嗣在位二十三年卒謚端子顯榕嘉靖元年以長樂王封世子十四年嗣

吾

世宗南幸王至承天朝諭王曰朕有事顯陵煩王來
朝感悅至意二十四年世子英耀弑之在位十年壽
四十謚愍英耀伏誅先是端王妃無出次妃生愍官
人田氏生次子顯槐愍妃吳氏都指揮鑑女二年生
耀耀封世子配陳氏讀書居緝熙堂槐封武岡王愍
官人方三兒有殊色耀悅之用樊鸞陶元兒吳么兒
通知內使張鑑門婆姚氏誘至緝熙堂蒸焉畱不返
母吳覘知之言愍怒將陶元兒吳么兒杖殺之幽
三兒姚氏北浣既而獲樊鸞杖四十幽馬廐耀懼而

生怨二十三年五月五日愍於墩子湖名諸宗觀競
渡有妓宋么兒耀又悅之引入別亭與飲他日吳鑑
病吳妃偕耀往視有劉金者嘗不悅於愍聞耀當
出先期匿么兒於舍邀耀耀至鑑所以他事行至金
舍與么兒爲樂居無幾遂取么兒入緝熙愍知之欲
繩金金日益憂恐耀忿甚遂起逆謀與徐景榮會金
等軟血爲盟約次年上元觀燈舉事正月十八日耀
遂設宴請愍愍猶期迎喜神然後往時顯槐未出閣
隨愍至耀所耀飲槐於夾室伺愍左右朱恩周廷瑞
等五人於雪洞密鎖諸所通往來之門而所進用鴆

愍不省率云不佳猶命呼書院厨子王喜保來呼人
方出燿舉彈砲張貴劉金督田堯周瘦兒等撤愍座
後皋比罽毼擁出謝六兒以銅瓜擊愍腦田堯曹景
昂李林官保周瘦兒曹良輔夏臘兒等齊力亂打須
臾而斃夏廷鳳等大聲呼變朱恩等驚起急來槐亦
來孫保兒等復以杖擊槐傷左脇彭漢扶槐奔貴全
堂避之朱恩等掇門而出登山號召將諸宮門謹閉
却從廣智門縋城而下走報撫按是夜燿更愍衣冠
扛入正官母吳哭謂燿曰哥哥喫穿不少如何幹這
等事燿曰非子所爲奴傭輩勾當耳旦日殮畢出方

三兒樊鸞等取入宮又次日令長史孫立承奉張慶
王憲等以中風報仍通崇陽等王保泰時撫按業先
聞矣上遣府部堂上官會同撫按審勘勅通城
王攝理府事逮燿至京刑部會文武大小官員覆勘
明白欽依將燿焚棄身屍徐景榮等凌遲孫立王
憲等棄市顯休等革祿三分英炊顯槐降勅獎慰
各賜銀五十兩彩幣四表裏庶三子英煥二十年王
氏生三十年嗣隆慶五年薨在位二十一年壽三十
一謚恭葬

妃李氏庶一子華五年胡氏生

楚昭王楨

楚昭王楨楨 高皇帝第六子也天資英睿有謀略
洪武九年冬之國武昌數奉 命督師討平大庸靖
州上黃諸蠻夷又討雲南阿魯禿禽之 太祖嘉悅
洪武二十二年肇啓宗人府 命王署右宗人事已
復征西番討道州全州桂陽諸叛虜平盧溪黔陽諸
洞蠻夷皆有功洪武三十年同湘王征古州 上賜
勅曰近蠻夷倡亂爾能與民同憂率護衛軍馬親征
之豈不稱賢王哉夫尊居王位安享富貴凡宮室衣
服輿馬皆民力所供若能奮威武除民患山川鬼神

皆將助順之矣永樂八年冬王朝於京師 文皇帝
以楚國無事上下相安嘉王賢能 賜優詔勞之并
賚其從官鈔人百錠文綺二襲十四年冬王復入朝
賜予甚厚明年冬王獻馬二千匹 詔受其百永樂
二十二年薨

武岡王顯槐

武岡王顯槐楚端王第三子也端王世子顯榕是爲
愍王嘉靖二十四年春英耀謀弑愍王於其第飲武
岡王別室中中飲變作從官朱恩大呼王亦奔往救
被縱傷臂愍王薨英耀伏誅 詔書勞王賜白金三

請設
宗學
立
正

斤彩幣玄黃四襲嘉靖四十三年八月王上書條議
藩政請設宗學擇立宗正宗表督課親郡王以下子
第十歲入學月餼之米一石三載督學使者考績陟
其中程式者全祿之五試而不中課則黜之槩給以
本祿三之二終身其庶人暨妻女月餼六石庶女勿
復加恩絕郡與罪廢者勿令濫留轉導儀賓工價請
一切停給免令謝恩京師廷臣集多采用其意王有
文集若干卷今梓行

俱藩獻志

齊庶人搏

齊庶人搏洪武三年封青州府十五年上令出獵開平且備胡二十四年春勅再出開平時潁國公傅友德總兵諭勿相叅奏凱勿矜功八月秋高水冷回京建文時有告變者召至京廢爲庶人時周王已削爵與搏皆繫禁靖難兵至急遣兵諭二正二王不知靖難兵也大怖伏地哭已知之乃大喜曰吾屬幸不死矣永樂改元復封又封其子賢烜爲樂安王賢烜長山王賢烷平原王搏之國驕縱上輒書諭戒來朝又面諭搏曰無忘患難時搏益自疑陰蓄亡命

養刺客僭帝號爲呪詛輒用護衛兵守青州府城北門自廣智門外接園苑築牆截往來守吏不得登城夜巡李拱曾名深等上變告搏匿其人滅口三年

賜書索珙論搏改過是月周王櫛上書悔罪上封

櫛書示搏明年來朝面謝廷臣劾搏罪請論如法搏厲聲曰奸臣喋喋無乃効建文時殺我會須盡斫此輩上聞之益怒畱搏京邸奪其護衛指揮柴直等伏誅罷遣罪斥府諸寮盡出王繫囚及所造不法械器羣臣又請罪教授葉垣等上曰齊王凶悖縱恣性習使然朕與王君臣兄弟出之圖圉寵以祿爵恩

禮渥洽誠心溫詞開諭至六七不悅教授輩奈王何
况垣等皆先自歸發其事可勿論搏雷京益有怨言
乃召其子至京父子並奪爵妃吳氏先卒葬青州宣
德三年福建妄男子樓濂詭稱七府小齊王建陽人
製王冠服謀不軌縣發其事械至京誅數百人搏及
賢疑三子暴卒景泰五年五月勅南京守備參贊齊
庶人谷庶人安置廬州者移置南京慎防之時齊庶
人賢懌搏少子也尚幼谷庶人絕而齊庶人請得谷
庶人第嘉靖十三年釋高牆庶人長鑒者搏曾孫也

吾學編

潭王傳

潭王梓母達定妃洪武二年纔二歲受封封十五年之國王幼聰敏好學善屬文嘗召府中儒臣試設體賦爲品高下出邸中貨爲賞洪武二十三年妃與民家坐事王不自安上遣使慰諭且召王入見王大懼與妃自焚死無子國除

吾學編

趙王傳

趙王杞洪武二年生明年四月封趙王封之日奉晉
燕吳楚五王升殿受冊寶齊潭趙魯四王幼內宮保
抱抱四王就位保抱抱受冊寶也又明年杞卒

吾學編

魯王傳

魯王榲母郭寧妃其妃湯信公女王生兩月而封洪武十八年之國兗州幼聰敏好文學善詩歌好餌金石藥二十二年發病卒命禮部尚書李原名議喪禮上曰父子天性謚法公義朕不得以私恩廢公義可謚荒子肇輝永樂元年嗣王宣德初上言長史鄭昭賢而老請致仕上諭蹇義曰魯王賢禮士宜如請宣德九年卒謚靖子恭堪成化三年嗣九年卒謚惠子陽鑄成化十二年嗣嘉靖十二年謚莊世子當從早卒嘉靖十三年以孫觀錠嗣王贈魯懷王懷王

子健拔封世孫早卒以子觀旋王贈魯悼王

吾學編

王以狝年嗣位事多不檢十六年館陶王當湏等聞於朝詔奪護兵三之二二十八年卒謚端二十九年庶子頤坦以寶慶王嗣嫡一子壽鏞封世子年卒謚溫肅

繩愆錄

魯藩靖王肇輝

魯靖王諱肇輝荒王長子也恭儉謹度文皇帝甚重之車駕北巡過魯王來朝賜以詩幣洪熙元年王獻瑞粟有一莖至二十穗者紀善王貞左史鄭昭在王國輔導積三十年請老宣德元年春王爲言

於朝詔以王賢而禮士特從之予誥命致仕王享國六十四年成化二年壽七十九薨

輔國將軍當潰

輔國將軍當潰曾鉅野王諸孫也慷慨有志節嘉靖三年春上書請停郡縣主君邸典以蘇民困嘉靖七年奏辭已祿并男奉國健樸祿米一千四百石佐縣官疏通運河賜勅獎諭是年秋又上疏言各藩郡縣主君先儀賓沒者故事儀賓得支半祿今四方災傷邊陲多事民窮財盡而各儀賓巢橫侈縱多不法請勿限品級月給喪偶儀賓折色八分明年潰又請

以父子應得祿糧佐賑封內饑民因勸上法祖
宗重國本裁不急之費息土木之工詞甚剴切上
嘉其意在卹民且以節儉獻規特勅褒之不聽辭祿

奉國將軍健根

奉國將軍健根魯鉅野順僖王諸孫也博通經術能
文詞多所延納凡宦遊兗中者無不知將軍名每會
坐客恒滿將軍據上席握鐵如意談理疊疊不勸嘉
靖中魯王以將軍賢孝上聞下詔褒予年七十有
八乃卒子觀樞字中立爵鎮國中尉被服備素雅好
著述執母孔淑人喪蔬食移年哀毀骨立嘗繪太平

圖一卷上獻 世宗皇帝嘉獎之 賜承訓書院名
額并五經諸書所著濟美堂稿書法權輿若干卷又
輯齊魯名士詩二十一卷名海岳靈秀集弟觀錫亦
以詩畫著名嘗請辭祿廬父墓未允

漢書志

魯藩輔國將軍毅齋公暨配夫人王氏合葬墓

誌銘

于慎行

公諱觀炊字某別號毅齋其先魯靖王之世也封於
安丘三傳爲榮順王有子六人最少者曰竹涯公健
橈誥封鎮國將軍配曰張夫人夫人諸姬有子五人
公在叔季之間母曰蕭碩人諸選名家子也公生而
穎慧英英吐奇五歲奏賜今名以嘉靖某年受封輔
國將軍輔國之秩二品古稱八命於法貴倨矣而公
內敦孝友外修退讓孜孜砥行不敢以世祿驕人德
義日有聞也其侍二親之疾衣帶不解葬而徒跣扶

輿哭蹕百里國人慕之諸生上狀御史且爲奏褒公
謝弗願鎮國王子祿厚貲產頗豐公與兄弟中分讓
腴取猶曰幸奉國恩食租衣稅不忍以父產傷同氣
心然公廢積貲予什一取贏久之家更饒裕而居常
誦薛公之市義也一日召子錢家盡取其券焚之所
捐金數千兩穀數千斛子錢家頓首祝釐有下泣者
而公名大譟魯城中矣滋陽恭裕王家匱而孱病而
爲公泣以弱小孫爲寄及壯當封而爲疆宗所持莫
敢保任公奮曰此王適也策在天府何罪而翦之茅
遂與安丘府主及中立公同署名焉又出橐金數百

及多爲假貸滋陽以是得封奉公終身如大父禮安
丘家監以王少子登城爲邑令所誰何邸中諸少年
欲往譙令公聞遽止曰諸君胡不自喜至欲辱天子
更以扞三尺王少子出無與衛令何用識之衆皆曰
然遂解胥吏有通幣金而逸者長吏捕得榜掠幾死
荷校及門而乞公助之金若干乃不問其姓名或請
爲券公曰人方身無完膚三日不食忍責其券耶曲
阜孔生弘煦推擇爲令從公貸二百金命下而弘煦
死子姪以田及器物來償公愀然曰所爲貸而公者
義也而公不沾斗食而死而吾收若田及器物爾曹

何用爲生盡却弗受魯人益尊信公稱爲長者公爲人偉丈夫也白晢修髯眉目如畫進退容止甚修少時嗜學好古北面經師多所誦覽又工爲歌詩及曲咸有意致第中小築亭苑環植花竹日召故人賓客觴詠優遊爲樂未厭而無聲色華侈之娛旣以好義立名遠近赴之如響於屬又尊宗人推爲祭酒緩急質成凡公所調護無不人人厭其意者雅有口辯談說古今纒纒有味小大咸樂聽焉公生嘉靖己丑九月二十六日卒萬曆己亥四月六日得壽七十有一子男二長願璫次願輔俱封奉國將軍

蜀王傳

蜀王椿母郭惠妃滁陽王女也洪武四年生生十一年而封成都惠妃生王及代谷二王永樂汝陽二公主王元妃涼國公女王讀書好善近儒生能文章

禮方
對

高皇呼爲蜀秀才未之國歲清明遣祭滁陽王墓於滁州之國初卽聘漢中教授方孝孺牧世子待以賓師禮推恩母族歲時問遺不絕常登祿贍郡教授月一石當是時邊王歲出塞征胡王以雅好學問守西垂安靖與民休息永樂三年來朝二十一年卒謚獻太子長悅嫌次悅燿悅燁悅忻悅燭悅怖悅嫌早卒

謚悼莊世子嫡孫友堉永樂二十二年嗣初友堉爲
世孫叔華陽王悅燿謀奪適獻王怒斥去不悛囚而
繫之又不悛益怒誣友堉罪於朝 文皇召友堉叔
姪自明比至 文皇崩 仁宗察悅燿誣世孫得嗣
王之國未幾悅燿又走京師誣友堉 仁宗怒抵奏
地下曰適庶大倫干分誣親獨不畏鬼神乎謂侍臣
曰悅燿虧忠孝懷奸讒使歸蜀終亂其國徙武岡州
又徙豐州宣德五年友堉府中忽舉炮銃總兵陳懷
聞上罪府官 上還護衛三之一已而請王府官屬
畱軍中南人爲匠皆從之宣德六年卒謚靖無子宣

德七年弟友堦以羅江王嗣友堦獻王孫靖王母弟也宣德九年風疾上念王賢走醫調視未至卒謚僖無子叔悅卿宣德十年以保寧王嗣儉飭守禮法天順五年卒謚和子友垓善草書天順七年以世子嗣是年卒謚定子申鉉天順八年嗣成化七年卒謚懷無子是年弟申鑒以通江王嗣好學能文弘治六年卒謚惠明年子賓瀚嗣仁厚好儒術正德三年卒謚昭明年子讓栩嗣嘉靖十五年守臣言王忠孝上特褒賞二十年上黃金千兩白金萬兩修宗廟加祿歲二百石玉帶一王受玉帶辭祿世子承鎰吾學編

二十六年卒謚成子承鑰二十八年嗣三十七年謚
康子宣圻四十年嗣

繩愆篇

蜀獻王椿

蜀獻王諱椿 高皇帝十一子也洪武戊午歲 冊
封二十二年冬之國成都王孝友慈祥博綜典籍容
止都麗雅有儒素風嘗奉 命中都閱武卽闕西堂
延攬名士李叔荆蘇伯衡等商榷文史 高皇帝常
以蜀秀才目之及就國聞漢中博士方孝孺名以幣
聘爲世子傳嘗臨講郡贊觀諸博士清貧爲分祿餼
之月一石遂著爲令府中屬官有能進昌言者厚加

禮遇沒世猶存恤其後燕居之闔大署忠孝維藩以
自勵焉谷庶人槐與王同母而槐數背異志所爲多
不法會王子悅燭獲罪於王走之槐所槐因詭衆謂
燭爲建文君欲召誦倡亂永樂十四年秋王上書暴
槐罪狀於朝 文皇帝報王書曰槐潛萌異志張與
嘗再言之兄未信今得賢弟書具有實事人之無良
亦至於此賢弟此心周公忠存王室之心也賜王黃
金二百兩白金千兩鈔四萬錠玉帶一束龍袞九紵
錦羅紗綵繒諸物稱是乃下詔正槐罪奪其爵爲庶
人已而王朝京師復賜白金三千兩米萬石雜紵紗

羅絹二千疋馬百匹火者百人永樂二十一年二月
薨上悼惜良久特謚曰獻所著文章名獻園集若
十卷

蜀定王友垓

蜀定王友垓和王之子獻王之孫也嗜學善書能文
章克纂獻王之業著文集十卷子惠王申鑒尤警敏
好文敬禮才名士弘治六年薨者惠園集若干卷惠
王之孫讓栩是爲成王性靜哲喜儒不遇聲伎動遵
禮法創義學修水利賑饑救災多所全活嘉靖十五
年冬撫臣吳山按臣金燦以王行誼聞賜勅嘉獎

署其坊曰忠孝賢良嘉靖二十六年癸

潘獻志

湘王栢

湘王諱栢 高皇帝第十二子也母胡順妃洪武四年生洪武十一年冊封之國荊州王粹美嗜學讀書嘗至夜分篝燈警枕精思入微人莫能窺其際開景玄閣招納儒乂日事校讐志在經國論古兵制有宿將所不及者膂力過人握弓矢刀槊馳馬若飛嘗受命征常德叛虜敗之扁渡磯焉洪武三十年五月同楚王討古州蠻夷克之出入綽囊乘書以自隨遇山水勝境輒徘徊終日勒石記事平居被服儒雅尤善道家言常自號紫虛子建文初疑忌親藩或有告

王反者

朝廷遣使卽訊王懼無以自明闔宮焚灰

謚曰戾王

成祖靖難後改謚曰獻爲置祠官守其

園

藩獻志

代王桂傳

代王桂其妃武寧王女洪武十一年封豫王二十四
年改封代王明年之國大同建文時廢爲庶人靖難
後復封宣德二年王請得樂器制器王妃仁孝文皇
后妹也王不悅妃妃病王不視孫仕壘聞於朝乞勅
潞城王遜炘啓王善視妃九年王欲率諸子孫來朝
不許王又與其子遜炘遜炘衮衣冠遊行市中袖錘
斧傷市人上與書戒飭稍斂戢正統十一年卒謚
簡十一子世子遜端早卒正統十三年以子仕壘王
贈代戾王仕壘正統十一年嗣嘗上言總兵郭登有

功大同虜欲得大同爲巢穴非登大同不能守 朝
廷爲勞登天順七年卒謚隱子成鍊嗣弘治二年卒
謚惠子聰沐嗣坐罪徙山西省城弘治十一年卒謚
思子俊杖嗣嘉靖三年大同軍叛王東走宣府 上
遣光祿少卿蕭淮問王嘉靖六年卒謚懿九年子充
懼嗣請郡王庶子祿禮部言郡王庶子無長兄得嗣
郡王者封長子不復得支將軍祿長孫亦如之不許
十一年大同軍又叛王東走宣府 上又遣官問王
王父子再遭禍變忠慎自檢得不爲諸逆染蟻十八
年秋樂昌王乞徙代州禮官周旋得徙朔州禮科都

給事中丁湛上疏曰樂昌一府以城狹隘物價騰貴得徙代王亦以是爲請何以應之天下宗藩類皆聚處一城亦皆以是爲請又何以應之況代藩北控邊鄙南輔圻甸比之他藩尤爲要重數年以來叛者繼起稔惡不悛皆積疑所致近由少寧王宜休息示以安靜乃今宗親無故改遷搖惑衆志不可已而樂昌王竟徙朔州先是景泰五年昌化王任渾言大同地瘠乞移封就祿便養景帝亦不許

吾學編

充耀嗣王二十六年卒謚昭庶一子廷埒封恭興王二十八年嗣三十年王捐祿銀五千兩以濟選軍之

用上以忠義可嘉降勅褒之萬曆元年卒謚恭庶
一子鐸鉉封太平王萬曆三年以貪暴兇肆革冠服
戴罪管理府事歲給祿米三之一准五年後能悔罪
自新撫按奏請定奪

繩愆錄

靈丘端懿王

靈丘端懿王聰漏代簡王之玄孫也長子俊格嗜學
善屬文聚書數萬卷尤好古篆隸墨蹟嘗手模六十
餘種勒石名崇理帖 世宗時獻 皇儲明堂二頌
又上 睿宗章聖輓歌 賜金幣嘉獎著天津集若
干卷嘉靖二十四年卒端懿疏乞封其孫廷址爲曾

長孫禮官以無典故可按第靈丘四世嫡長宗室盛
事應擬何長孫封漸 上嘉王壽考宗室鮮比特許
之已而復封址子鼎鑣爲玄長孫嘉靖三十四年端
懿乃薨壽八十三鼎鑣襲高祖爵

清獻志

大明靈丘榮順王墓誌銘

趙 啟

代府靈丘王實系 太祖高皇帝一世孫 代簡王
之六子甫十歲 宣宗章皇帝賜寶冊封爲 靈丘
王配郭氏冊爲王妃奏娶馬氏封爲王夫人先居大
同王自授封日見英邁勤學好問手不釋卷凡過目
遂不忘發爲詩歌溫厚典雅率多奇句有雲溪稿千
餘首修身慎行揖遜謙恭不嗜聲色貨利所行者惟
忠孝仁義濟人利物絕無吝吝克遵 祖宗成憲而
罔敢怠荒尤敦睦倫彝敬待斯文從容自如未嘗疾
言遽色故父母兄弟稱其孝友鎮守大臣服其賢能

適世孫幼上簡賢三勅推理國事幾十有五年維持
有道綜理得宜致基業益饒裕及世孫成立遂怡然
以退平居優游以琴棋書畫爲樂王昆季二孫甚蕃
衍於時當道者以雲中爲邊郡大兵駐劄之所地隘
不堪以居遂封章 奏請之國絳州益慎持守始終
一致王聰敏無所不能尤精於醫頻年瘟疫流行死
者甚衆遣醫載藥遍詣鄉村治之給至三萬餘貼遇
井亦投以避瘟等丹使飲水者不染患全活者難以
數計成化壬辰久旱不雨王竭誠親詣壇廟請禱大
雨如注三日方止民皆焚香叩門稱謝以爲非德與

誠敬不能動達好修善事敬禮神明屢有感格晚年
忽遽腹疾年餘醫不効成化十一年八月九日自度
弗能起命移居正寢先召適長子諭之曰生死常理
不足爲異繼承王爵務須慎重以永其傳次諭諸子
儀賓皆當謹身節用毋廢職謂妃郭氏曰素賢能不
以我憂垂白相守至願已足今與汝永訣再諭夫人
馬氏以如斯言也言訖瞑目安然而逝于七長 欽
賜名仕塲今爲王儲次仕穀仕輩仕增仕堉仕
堉俱封爲鎮國將軍

肅王傳

肅王模洪武十一年封漢王二十四年改封肅王於
甘州建文元年乞內徙蘭縣永樂十七年卒謚莊庶
長子瞻炤二十二年嗣正統元年言甘州舊邸改都
司而先王墳園尚在乞開近邸林木從之府中嘗被
盜劫榜募告捕者賞馬銀御史以問罪其長史楊威
又請加祿宣宗曰洪武永樂間肅王歲祿五百石
莊王不言者以朝廷念地遠輸轉甚難故也仁
孝卽位加五百石矣朕遵祖訓不敢逆天順八年卒
謚莊庶子祿埤成化四年以洵陽王嗣十五年卒謚簡

子貢綜成化二十三年以汾川王嗣正德中爲諸子
請菜戶不允嘉靖十五年卒謚恭子眞於弘治四年
封世子嘉靖五年卒謚安和次子弼枕初封鎮國將
軍嘉靖十一年改封世孫十七年嗣王贈其父肅靖
王

五世學編

四十一年薨在位二十四年壽六十三謚定嫡一子
縉烱六年生十一年封世子三十六年薨壽三十一
庶一子紳堵二十七年生四十二年嗣贈父昭王四
十三年薨在位二年壽一十七謚懷無子靖四子
鎮國將軍弼柿卒庶一子輔國將軍縉熾倫序及之

禮官論以越世 世宗准本職奉祀理府事議繳還
冊寶罷諸司衛儀等衙門 穆宗卽位定妃吳氏及
延長王真澆等奏以邊陲藩屏宜得王重鎮上言
聖祖以羣雄定天下報功駕馭之典有降弗替臣祖
莊王受封茲地操練屏衛征剿勦苦反不及勲武之
臣而涉於親堂之疑其何以安內懷外凡數百言
上准襲王食本祿禮官仍議以邵府理國 上特批
出着襲肅王隆慶五年嗣

續錄

遼王傳

遼王植洪武十年生母韓妃也生二年封衛王改遼王國於遼東廣寧城廣寧五衛盡屯田給王祿王得巡邊出塞練簡士馬已而坐罪奪祿衛靖難兵起渡海歸朝改封荊州 文皇卽位來朝卒謚簡子貴烺嗣正統元年府臣乞加祿 上言簡王得罪 朝廷太祖特加原貸削其護衛止與校尉三百人 仁宗令王嗣倍加祿得支二千石 宣宗又與旗軍三百人 朝廷親親已至王於庶母諸弟寡恩府臣不聞匡正直爲王請加祿不允四年坐滅絕天理潰亂

人倫廢爲庶人簡王第四子貴煥以典山王嗣卒謚
肅子蒙璠嗣世子恩鏞卒謚榮穆王請以世子妻妾
殉葬 憲宗不許卒謚靖子恩鏞嗣卒謚惠子寵沒
嗣卒謚恭子致格嘉靖三年嗣卒謚莊子憲櫛初封
句容王嘉靖十八年嗣

吾學編

隆慶二年有臯國除熾性淫詭喜方術有荊州衛指
揮王朝彥監生鍾應斗應山王教授子杭州生員宋
章甫及方士顧通誠劉洞玄李一山等朋比蠱惑樂
工吳江門隸申觀光性姿嫵媚蚘尤寵愛又有民校
劉廷瓚軍校上鵬吏王世臣劉鶚及王漢任良等皆

親任用事遂以第二女選章甫男宋荆陽爲婚納授
江典儀觀光典寶鵬延瓚各金吾指揮世臣鴉各引
禮周文憲等俱有冠帶洞玄等以法書符呪時時干
之欲得生氣人頭爲用遂令校尉施友義將醉臥街
民顧長保割取其首一城驚視不敢誰何假修玄請
於世宗賜歸清微忠教真人及金印嘗法衣法冠前
列諸神免迎牌拷鬼杖入齊民家爲高功勒取謝禮
無算先是鄉之幼也光澤榮端王寵漢理國事睹鄉
恣睢不法時時勸諭鄉衛之後誣其子致標聚庵之
醜每出遊闌闌沙市不備法駕從數十輩遇少年男

女美色者擁入府中淫污漸收婦人數多建三宮以處東曰雙蓮樂婦陳五兒領之西曰芳華揚州顧氏領之又曰曰裕昆王安然領之各鑄銀印收掌廣元康僖王致棋薨有美妾月娥翠兒蘭香等嬪皆收之宗室致槻母黃氏嘗以事見嬪嬪悅之哄至密室逼姦不獲乃絕其飲食六日不死生置棺中扛廊門外焚之儀賓趙儒妻原陵縣君嬪祖姑也誘致府中姦之先是納娼張大兒生子川兒育于鵬家漸長請名儀賓李世榮張棟郭興爵等欲發其由嬪卽將世榮挈至寶訓堂打死竟朦朧得請賜名術璽巴東府奉

國中尉致楠請封鄉不行楠咎徐彥率撥置鄉大怒
令杜芳縛草人爲楠形以李明監斬於楠門大都上
自宗姓下逮齊民一有觸忤百計摧折必有重賄始
得保有身家不則其旣叵測長史越民表見鄉非人
所爲每前稱說古賢宗事以感動鄉鄉不悅良醫畢
栢被寵謀寧已革宜城府印信表曰國憲誰敢干之
鄉曰必不得已關防可表又曰國憲誰敢私之鄉益
怒百方阻抑表遂托以目疾辭歸鄉遂自掌司印名
爲統攝司事而諸務令王鵬發落名爲分理司事前
後宗室請封各定等級勒取使用貧難如松滋等王

府嫡庶子女一百四十一位竟便過期不得名封
世宗晏駕 詔至不衰不衰巡按御史陳省爲列其
事上遣刑部侍郎洪朝選錦衣指揮程堯相勘明削
去世封送發高牆衛墾武昌安置

繩愆錄

慶王傳

慶王梅母余妃洪武十一年生二十四年封慶陽二十六年徙韋州建文三年冬移寧夏 文皇令歲一至韋州度夏宣德初上言寧夏卑濕水泉惡乞仍居韋州不許許歲一往來韋州如 文皇時未幾護衛人告王閱兵造戎器購天文書 上書諭王小人誣叔祖置之法慎勿疑內臣馬安住居自寧夏言王以謗故不自安 上又書慰王五年王請入朝不許王遂請移家寧夏如永樂洪熙得往來韋州許之正統十三年卒謚靖子秩燧十四年嗣景泰元年以虜數

入寧夏與其弟安化王秩終上書乞徙內地不許又
言冕服以紗製請易紵絲 上曰 祖制朕不敢易
成化五年卒謚康子邃璽成化七年以平涼王嗣十
五年卒謚懷弟邃璘成化十七年以岐陽王嗣弘治
四年卒謚莊子寘釐弘治七年以洛交王嗣十年卒
謚恭子台浚弘治十六年嗣時虜數入塞賊發恭王
墓嘉靖四年謀不軌法司請如代王聰沐例徙西安
上不許降庶人畱邸歲與米三百石已又不悛徙
西安其長子肅櫜封世子攝府事十二年世子及懷
王妃王氏乞恩畱台浚故邸禮官執議不可十五年

兩宮徽號詔許台法還邸與冠帶

吾學編

三十年卒謚定世子肅愼先卒謚端和庶弟肅枋以
桐鄉王進封世子三十二年嗣萬曆二年卒謚惠世
子倪熾萬曆年嗣

續譜錄

郡王安化反誅絕安化王寘鐸者慶靖王曾孫也祖
秋終慶靖王第四子永樂十九年封安化王謚惠懿
父遂塹封鎮國將軍弘治六年贈安化榮和王寘鐸
成化二年封長孫弘治五年奄瑾擅權毒亂天下寘
鐸遂起逆謀告生員孫景文曰日者言我有帝王骨
相現王九兒降鸚鵡神妄言禍福每見寘鐸呼老天

子真鑄益冀望非分會大理少卿周東度田寧夏倍
益頃畝索厚租徵馬屯租甚急景文謂真鑄曰殿
下欲圖大事大事此其時矣真鑄遂爲酒名都指揮
何錦周昂指揮丁廣謀反以誅奄瑾爲名是年四月
五日真鑄爲酒大會巡撫安惟學總兵姜漢周少卿
李奄奄及漢至巡撫少卿辭不至錦等矯言虜入塞
急呼壯士申居敬等捕虜執兵械跨馬呼噪儀賓韓
廷璋等伏府序下錦等趨安府椎門入序中伏兵起
殺漢及奄走行臺殺惟學都指揮楊忠又殺周少卿
縛侯叅議放獄囚焚官府劫庫藏奪河舟大索慶諸

王將軍金幣萬計呼召逆黨平虜城千戶徐欽引兵入城僞造印章旗牌又令景文爲僞檄言瑾盡惑朝廷變亂祖法屏棄忠良收集兇狡阻塞言路括斂民財藉沒公卿封拜戾伯數興大獄羅織無辜散遣官校脇持遠近張綵劉機曹雄毛倫文臣武將內外交結意謀不軌今特舉義兵清除君側凡我同心並宜響應傳布邊鎮以錦爲討賊大將軍昂廣左右副將軍景文軍師張欽先鋒將軍魏鎮等七人都護朱霞等十二人總管當是時遊擊將軍仇鉞陷賊中欲起兵擒賊自效恐河東兵未集稱病臥鉞蒼頭潛入城

言副總兵楊英都指揮韓斌延綏副總兵侯勛遊擊將軍時源各率兵屯河上廣武營都指揮孫隆焚兩壩掃捲河舟盡奪泊東岸矣鉞喜尚稱病臥錦率都指揮鄭卿等三千人出覘渡口畱昂守城昂問鉞病鉞猶稱病不起伏諸蒼頭俟昂入殺昂鉞卽起開門一呼諸游兵壯士楊真等聞之卽趨安化府殺朱霞等十一人擒真鑄及其子台滑遣古興兒密告鄭卿令反正卿遂殺魏鎮等十人錦廣走追擒之賀蘭山外朝廷聞變遣都御史楊一清太監張永督諸軍討賊未至寧夏賊平一清永至陝械真鑄錦廣等至京

頌繁寘鑄諸王館錦廣等下錦衣獄廷鞠伏誅弟寘
鏡寘錫坐黨廢庶人將軍肅材俘至京既論死正德
中山僧大千和尚者富財凌同類同類毆和尚和尚
憤曰我皇帝家人也衆異其言聞於朝逮至京下刑
部獄和尚曰我安化府肅材也衆不能辨安化宮人
左寶瓶在浣衣局召驗和尚寶瓶叱曰此肅材殿下
得免死送高墻竟不知當時代肅材死者誰也

吾學編

寧庶人傳

寧庶人宸濠寧獻王權世孫也洪武十四年封獻王於大寧大寧在喜峯關外古會州地洪武初設北平行都司大寧城中東聯遼東西接宣府爲巨鎮文皇時封北平以每歲秋九月會廣寧遼王及寧王宣府谷王大同代王太原晉王西安秦王韋州慶王甘肅王出塞捕虜名肅清沙漠以故諸王皆有重兵文皇靖難初與諸將議曰曩余巡塞上見大寧朶顏諸夷驍勇善戰戍卒皆間左罪謫不能寒吾得大寧斷遼東得胡兵助戰吾事濟矣乃令世子居守率

銳卒千人倍道趨大寧遺書寧王言窮蹙求救吾弟
王邀 文皇單騎入城執手大慟言不得已至此南
兵百萬旦夕且破北平非吾弟表奏不可寧王爲草
表謝請赦居數日款洽不爲備北平銳卒伏城外諸
親密吏士稍稍得入城遂令陰結諸胡酋長及思歸
之士皆喜定約 文皇辭去寧王餞郊外伏兵起執
寧王擁入關諸胡戍卒一呼皆集守將朱鑑不能禦
戰沒總兵官都督劉貞遜還京師行軍都督陳亨皆
降燕於是靖難兵益強當是時寧王善謀時草檄傳
諭靖難後遣內官書諭王再三王入朝相見甚歡因

乞改南土初欲得蘇州 上曰蘇州圻內不許又欲
得杭州 上曰五弟初封錢唐爲吳王 皇考以爲
不可改開封建文無道封其弟允熈爲吳王竟不克
享建寧荊州重慶東昌皆善地惟弟擇焉寧王得書
遂出飛旗令有司治馳道 上大怒王不自安屏從
兵從五六老中官走南昌稱病臥城樓乞封南昌
上不得已卽藩司爲府改封王已而人告王誹謗巫
蠱事 上書諭王王不自安稍稍自斂戢 仁宗卽
位乞朝京師又言江西非其封國請改封 上諭王
叔受封先帝已二十餘年朕不敢違 宣宗卽位以

大父行又復輒恣橫請於封內選子女不許重違其
意賜女婦八十四人王令省中官服朝服用天子儀
仗賀王元旦長至千秋節習儀鐵柱觀副使石璞聞
於朝乞罪其長史王堅朝議定宗室將軍祿米視品
王抗言宗室安得有品詞不遜時漢庶人方以反誅
上答書詞甚厲云將軍中尉有品 祖訓也王不
得棄 祖訓肆煩說王卽不謹非獨羣臣有言不已
天下人心亦不容已徒恃尊屬誣鱣朝廷典憲俱存
朕不敢庇未幾又乞灌城田不許稍斂戢托志神仙
正統十三年卒謚獻子盤斌未嗣卒謚莊惠世子景

泰元年以子莫培嗣王追封寧惠王莫培以世孫嗣
王景泰七年坐事革護衛弘治四年卒謚靖靖王長
子觀錫天順八年封上高王弘治五年嗣王十年卒
謚康康王庶子宸濠母馮針兒故娼也弘治八年封
上高王十二年嗣王濠輕佻無威儀好弄喜兵嗜利
狗色凌宗室瀆亂無禮養死士爲羣盜江湖間及劫
郡邑府庫財萬萬計術士李自然李日芳妄言濠骨
相天子也濠時時訶中朝事聞謗言輒喜聞言明
聖朝廷治卽怒不應正德初通逆瑾賂金錢無算得
復護衛安化王反瑾誅革護衛未幾復結錢寧諸權

奸又得復護衛益大肆擅殺都指揮戴宣逐布政使
鄭岳御史范輅幽知府鄭獻宋以方盡奪諸附王府
民廬副使胡世寧言王橫無道不早裁抑禮樂征伐
不復出自朝廷濠出金璧萬計遣奄余欽入京徧遺
中朝內外文武大吏朱寧蕭敬張雄張銳江彬陸完
石玠欲殺世寧不果謫戍遼東自是益復無顧忌日
與李上賓劉養正王春謀不軌又見武宗巡遊東
宮久虛令典寶萬銳益賂諸奸佞欲召其子大哥入
京以上廟燒香爲名幸事萬一成得自取正德十二
年府典寶閔順內官陳宣劉良上變告濠疑出承奉

周儀意盡殺儀家及典仗查武數百人令承奉劉吉持金錢又徧遺諸權奸佞幾殺順等於是逆謀益急妃婁氏累泣諫不聽大集羣盜凌十一閭二十四吳十三等數千人置丁家山諸處四出行劫置奄畢眞鎮守浙江約起事爲應又約廣西土官狼兵及南贛峒蠻是時士實養正春吉銳日夜與濠謀恐起事以反名人心未服伺一日宴駕大位未定乘變卽起萬一事成益遣奸黠盧孔章等分布水陸孔道萬里傳報浹旬往返踪跡大露朝野皆知濠旦夕必反巡撫都御史孫燧日夜防遏濠托勦賊名置郡邑城郭兵

食事甚悉嘗歎曰卽賊起吾不滅賊賊必以吾所處分故速滅又連上七疏言濠反在旦夕濠諸奸邀諸途卽不得諸權奸得濠金錢多恐事泄并誅又幸冀非望往往匿不聞十四年言官合詞言濠必反狀上遣駙馬都尉崔元都御史顏頤壽太監賴義諭宸濠令改過府中人以爲名濠六月丙子因諸司入謝濠酒遂稱密旨反劫燧及副使許達燧達叱濠無反自速死吾死不從汝爲賊遂殺燧達僞授士實太師養正國師吉太監春尚書凌十一等都指揮急走人令畢真反杭州爲應遣涂欽等攻九江南康王春等

發旁縣諸賊黨九江南康城破七月壬辰進攻安慶
知府張文錦守將崔文楊銳力禦不肯下濠以江西
僉事潘鵬安慶人遣鵬招安慶文誅鵬家濠議僭大
號改年順德士實養正言宜至南京正位然後改元
布詔是時汀贛都御史主守仁已傳檄遠近討濠濠
不敢離南昌已而聞守仁兵未集士實養正造僞檄
指斥朝廷謂上以莒滅鄆高皇帝不血食建寺
禁內雜處妓女胡僧玩弄邊兵身衣異衣至於市井
屠販下流賤品事靡不樂爲棄置宗社陵寢而造行
宮於宣府稱爲家裏贖貨無厭荒遊無度東至永平

諸處西遊山陝三邊所過掠民婦女索取贖錢又謂
常懸都太監牙牌稱威武大將軍又謂旣奪馬指揮
妻稱馬皇后復納山西娼婦稱劉娘娘原其爲心不
能御女又將假此婦人以欺天下抱養異姓之子如
前所爲也畱萬銳拱條等守南昌偽勅吉提督軍務
叅政王綸叅贊軍務分諸賊爲五哨一百四十隊戊
戌直趨安慶庚子攻城不克甲辰以天梯攻又不克
安慶守益堅又聞守仁兵且至濠懼方欲退還南昌
丙午聞守仁辛亥破南昌擒拱條萬銳及濠子三哥
四哥濠大懼解安慶圍甲辰至樵舍乙卯遇守仁兵

黃家渡戰敗丙辰又敗丁巳守仁急督戰火攻濠大敗婁妃投水死擒濠及其子大哥吉士實養正等濠曰紂用婦言亡而我不用婦言亡上初聞濠反江彬等幸出巡遊勸親征遂下詔暴其罪告郊廟革封爵削屬籍親統六師征之詔未下守仁已擒濠濠六月丙子反七月丁巳就擒濠反謀雖久意僥倖倚奸人得竊位不欲顯言稱亂及事急反始掠省城兵器燧已名計賊移外郡倉卒不能備招賊又爲諸下邑遏不得去諸僞將皆賊徒未嘗知戰士實養正徒以區區文詞議論負時名不知兵諸附者皆富貴子弟

聞守仁倡義誅討未及見兵皆逃避去燧所置初城
遇賊不得逸盡就縛檻車至南京諸權奸得濠金錢
者尚在武宗左右或握兵間通語言濠謂且得釋
獨忌守仁有權術兵精慣戰不敢動回鑒至通州誅
濠弋陽王拱橫攝府事初獻王五子二子盤輝臨川
王天順五年罪廢爲庶人幽高牆三子盤烱宜春王
四子盤炷新昌王五子盤煥信豐王弋陽王者靖王
弟奠堦始封弋陽謚榮莊榮莊子覲錄嗣弘治十年
卒謚僖順僖順三子長子及二子天季子宸汭弘治
十二年嗣正德九年卒謚莊僖莊僖次子拱橫正德

六年封鎮國將軍嘉靖元年攝王府事二年嗣弋陽王二十年爲稍設官屬子多焜嘉靖五年封鎮國將軍存者八

吾學編

寧獻王權

寧獻王諱權 高皇帝十六子也生而神姿秀朗白哲美鬚冉慧心天悟始能言自稱大明奇士好學博古諸書無所不窺旁通釋老尤深於史洪武二十四年冊封之國大寧大寧古會州地東連遼左西接宣府北邊要鎮也所統封疆九十城帶甲八萬革車六千諸胡騎又驍勇善戰王智略淵宏被服儒雅數會

邊鎮諸王出師捕虜肅清沙漠威震北荒建文中齊黃用事疑忌諸藩多所出削以王英武擁重兵於邊下勅召還京師王未命遂削王護衛軍靖難師困白溝覘王已奪兵柄遂襲破大寧取其軍資佐師師復振文皇帝踐祚不欲壯王在外永樂元年二月改封王於南昌王亦深自韜晦所居官庭無丹彩之飾覆殿瓴甌不請琉璃構精廬一區蒔花藝竹鼓琴著書其間故終長陵之世不被譴責仁宣時法禁稍解王乃得上書言事蓋一日而封九女又嘗請乞南昌灌城一鄉土田及論宗室不應定品級事皆未

行晚節益慕狎舉自黜臞仙建生墳緱嶺之上數往
遊焉江右俗故質樸儉於文藻士人不樂聲譽王乃
弘獎風流增益標勝海寧胡庶白以儒雅著名王請
爲世子師傅者七年告老而歸王爲輯其詩文序而
傳之凡羣書有繫風化及博物修詞人所未見者莫
不刊布國中所著通鑑論二卷漢唐秘史二卷史
斷一卷文譜八卷詩譜一卷神隱肘後神樞各二卷
壽域神方四卷活人心二卷太古遺音二卷異域志
一卷遐齡洞天志二卷運化玄樞琴阮啓蒙各一卷
乾坤生意神竒秘譜各三卷采芝吟四卷其他注纂

數十種經子九流星曆醫卜黃治諸術皆具古今著述之富無逾獻王者又作家訓六篇寧國儀範七十四章皆以忠孝恭儉垂訓子孫盟諸山川社稷之神有弗率訓範者受顯僇在位五十八年壽七十有一正統十三年九月望日薨世子諱磐斌孝友仁厚洞達理學有淵審之譽正統二年正月十有九日先獻王薨世孫莫培嗣爵追謚爲惠王

寧靖王莫培

寧靖王莫培惠王子也隴幹疎髯尤敏於學才藻豐贍一意修文辭造語驚絕若仙謠郎婦吟擬古詩二

百餘篇皆雋遠有思致嘗撰文章大格式及古今法書各十餘卷松石軒詩評一卷其書法矯潔道勁號曰鐵畫銀鉤然性孤介寡合卽諸父兄弟小有不愜動生猜嫌以故臨川弋陽虢爵皆王志也在位四十三年壽七十四弘治四年薨

弋陽端惠王拱楨

弋陽端惠王拱楨莊僖王子也閩夷有幹局初封將軍同藩諸將軍已屬目其賢會宸濠作逆伏誅諸郡王勢相頡頏莫能一上以王守正不阿詔令統攝府事嘉靖初上書請復獻惠二王廟祀得備禮樂稍

增設審理奉祠典儀諸官屬自藩臬諸司以下歲時皆入謁如大藩禮嘉靖十九年撫按奏舉王忠孝賢良賜勅獎勵已復奏修獻惠二王寢園嘉靖二十九年薨

樂安端簡王拱樞

樂安端簡王拱樞靖莊王子也靖莊樸訥鮮慧而王以文雅才辯著稱兼精繪事繪菊石妙絕一時又能謙和虛已煦諸宗人會弋陽端惠王薨羣情更屬王賢始奏析弋陽總理於是建安樂安弋陽三王分治八支王薨子多煥嗣爵

石城恭靖王奠堵

石城恭靖王諱奠堵寧惠王第四子而謀埠之始祖也景泰二年冊封性莊毅簡貴寡言笑家法甚嚴子孫小違教者輒繫而笞之内外日凜凜從事時諸郡王多坐驕蹇淫虐見法王獨謹度秉忠未嘗有過舉在位三十六年成化二十二年正月十有二日薨子鎮國將軍諱覲鏞孝友慈惠動必以禮先恭靖一年卒子宸浮嗣爵追封端隱王

弋陽奉國將軍多煌

弋陽奉國將軍多煌僖順王曾孫也父拱檜豪爽喜

客善詩著負初集二卷煌恂謹孝友與弟烜燦焰皆
用文雅結友徧遠近子弟羣從莫不解藝善書一門
之內雖離焉弋陽恭懿絕嗣諸宗人舉煌賢能兩臺
采輿論上之 上遂勅煌攝弋陽府事瑞昌諸宗皆
屬焉煌性廉靜寡欲子壯趨趨重又嫻詞藻善承父
志政暇輒開逸園譙賓從雅歌投壺賦詩以爲樂著
委蛇集四卷先是熊淑人早卒將軍鰥義不更娶獨
處齋閣者二十六年萬曆癸巳冬兩臺疏舉煌政勸
行誼高等 上方欲下詔褒予會煌病卒 詔遣郡
太守加祭一壇蓋殊典云

奉國將軍拱枬

奉國將軍拱枬瑞昌恭僖王後也性樸茂好學善草書始枬父渠爲濠累逮繫中都枬請以身代嘉靖十三年冬 賜勅褒獎已復上大禮頌一章年八十有九乃卒子多斡好文雅以孝行聞舉宗正未果萬曆二十二年薦攝瑞昌府事 命始下而斡卒

奉國將軍拱樞

奉國將軍拱樞字茂材瑞昌拱枬弟也博辨儒雅有智數嘉靖九年冬上書請建宗學并詔宗室設壇墀行耕耒禮謹祀典加意恤刑後以議禮稱 旨賜勅

褒論又嘗捐田白鹿洞贍來學者與兄枏並以聲譽
致諸貴遊于鎮國中尉多燬字宗良博雅好修辭賦
典麗始與多燹齊名晚益折節虛已獎掖後雋草書
茂美有晉法給事中張應登薦堪宗正者於南昌則
首舉燬後病痿不廢吟諷譚藝者並宗尚之

奉國將軍多燹

奉國將軍多燹字用晦瑞昌拱樹子也始公族習爲
豪侈貴倨樹獨折節縉紳間以儒素督率子弟以故
燹一意修詩書工苦特甚里人余曰德與李攀龍王
世貞遊爲詩燹因德延譽海內然性簡貴矜莊舉止

多僻族人莫不屬目而遠之晚節益嗜黃冶閉關絕
慶弔禮再舉宗正而毀者益衆悒悒不樂卒是時建
安輔國將軍拱榭樂有鎮國將軍多谿並以文雅著
名谿尤嗜古倣物槌著瑞鶴堂詩集夾臺集各二卷
谿著支離市隱集北郭子魚樂詞三十餘卷

奉國將軍多炆

奉國將軍多炆字貞吉弋陽多煌弟也穎敏絕人善
詩歌兼精繪事見古名人墨蹟一再臨之如出其手
赤牘小行日可百函語語有致始與宗人熾境境等
結詞社久之遊道益廣海內譚藝者莫不知有貞吉

嘗輕裝遠覽山水蹤跡徧吳楚間所至傾坐家居以
精鐵冒門闔賓客雜沓未幾鐵復鎔去晚病尪羸良
苦猶吟咏不廢臨絕時操筆作帖命子埤等以白幘
鶴氅斂櫂側並鐫勒銘識門人子弟私謚曰清敏先
生所著五遊編勸遊編凡七卷梓行於世時樂安有
輔國將軍多棻亦雅有詩癖造語新奇與族人埤埤
塈塈修竹林之遊放志文酒夜以繼日終其世無忤
也竟病酒後貞吉一年卒

輔國將軍拱概

輔國將軍拱概石城端隱王之孫鎮國公宸澤第二

子也鎮國公性嚴重方正家法整肅宸濠欲屈之數遣人火其居而諷宗族資佐公以示惠公固辭不受以故濠敗獨免污鱣輔國公醇孝篤誠動以禮義自檢處暗室屋漏終無情容日稱述先賢懿行劄誨諸子孫嘗作家訓一篇其辭曰若幸弛負擔而嬰爵祿母以世及罔或誓於禮汝母侈於聲母洒於酒母作驕淫母囂於訟以顛覆厥家汝有子若孫迪以詩書母姑息是肆以戕厥性汝友朋以臧勿邇便佞善柔母豐殖貨賄以買怨汝御臧獲羣隸亦維莊厥身維孝維忠克昌厥後母事巫覡左道汝祖 高皇帝尚

有垂訓念之哉 今上御極上尊號 兩宮覃恩中
外公以年高有德再沐 詔書存問壽八十有四卒
長子奉國將軍諱多燿恭惠端謹好經術以敦睦著
稱娶俞淑人生謀埴奉國公常自督課授五經史漢
旁及星曆萬曆乙酉卒萬曆辛卯冬給諫柴公初春
疏請設江西宗正舉謀埴學行萬曆癸巳冬撫按兩
臺議增石城管理疏薦埴於 朝明年奉 勅管理
石城王府事得刑劾不法者石城自宸浮弘治中坐
事廢無王迄今九十有四年矣於是始得奉朝請攝
行王事所轄爵宗二百九十三人庶儀不與焉

俱藩
獻志

岷王傳

岷王榘初封岷州洪武二十六年建邸雲南二十八年之國建文初廢爲庶人流漳州靖難初復王王與西平侯沐晟交惡上賜書諭王名戒晟仍還鎮永幾驕橫收印章殺官吏激變夷人沈湎廢禮上怒罪其府僚奪冊寶尋念王建文中久囚繫復與冊寶洪熙元年徙武岡無王官寄居州治久之始建王官宣德元年岷世子微煖輒赴京奏事勅止之途不止乃微煖與奄謗其弟微燦也上爲斬奄遣微煖歸景泰三年乞移湖廣善地不許王卒謚莊時微燦已

封鎮南王矣莊王無子鎮南王嗣王王弟廣通王徽
殊謀反以蒙能陳 仔李祥爲總兵事覺廢爲庶人
四年王乞朝明年正月不許卒謚恭子音堃嗣卒謚
子膺鉅嗣卒謚簡子彥汰弘治十七年以江陵王
封世子嗣王嘉靖八年江川王膺燧請加祿戶部尚
書梁材言岷府郡王歲祿五百石米鈔兼支制也不
許初彥汰與其弟南安王彥泥訐陰事彥泥廢爲庶
人彥汰坐荒淫敗度抗制擅權幽囚嫡母焚死逼迫
多官稱臣亦革爵爲庶人令其子世子譽榮攝理府
事嘉靖十年譽榮爲父乞恩辭攝府禮官以見潯鍾

釁比奏授彥汰冠帶理府事十二年彥汰乞復王不

許十五年上兩宮徽號詔復彥汰王

五世學編

二十三年卒謚靖嫡子譽榮二十五年嗣三十一年
卒謚康子定燿三十四年嗣子幹跬萬曆三年封南

充王

繩壘錄

大明南渭莊順王神道碑

呂調陽

南渭王自岷府分封永州迄莊順王蓋四傳矣世以孝友雍睦聞於藩國桂林史氏呂調陽往典館局得稽其故實有桂林於永州猶堂戶然其知頗悉云王之薨也調陽方讀禮廬次其輔國將軍定燭具事狀遣儀賓張大訓詣桂林請銘神道之碑調陽竊附知王之小誼不敢不銘謹按玉牒冊王諱譽播洪武中高皇第十七子封岷王雲南洪熙元年陟王武岡謚曰莊順王生恭王恭王次子始封南渭王永州謚榮順榮順生懷簡王懷簡生安和王自恭王至安和

爲王高曾祖若考也王幼穎慧兒時母哭太妃口授
章句卽記憶不忘懷簡嘗抱置膝上曰他日光吾緒
業必此兒也孝友天性太妃遘疾久不愈晝夜侍湯
藥衣不解帶者逾月不懈居太妃與安和王喪哀毀
如不欲生發引日往返徒跣觀者感歎以爲儒生弗
及也與二弟鎮國將軍譽樞譽格極相友愛安和時
買民田若干皆上腴之產盡以付二弟且爲歲輸糧
於官格嘗感疾之南嶽避崇王中夜聞之輒起亟呼
人追請寢食俱減及返而後安侍宗衆尊卑行次曲
有儀度庶人某某自懷簡安和時構訟三十年不相

下王從容酌卮酒諭以祖宗訓制且爲奏請冠
帶婚資月糧二庶人感激叩首不敢復有異慮與士
大夫處款曲有情若布衣交不知其爲王也教授楊
仁重年老乞休厚贈之還舟車護從皆親爲點閱臣
僚無不感激思報者湖南水荒饑民十數人盜王困
谷爲守者所覺輒擒以獻王不忍加罪曰彼爲饑餓
所迫耳乃悉以餘穀賜之其人愧謝去終爲良民
性樸素自號石巖山人居常衣布陳都憲仕賢分巡
湖南時見王所服歎曰昔人布被入曰詐殿下布衣
人曰儉布一也人曰儉不曰詐難能也僻好讀書然

不泥章句意興所到作爲古文詞不事雕鏤而天趣
暢發狀稱經史百家莫不涉獵則令德所成雖其天
資粹美亦學問之益也麗貌豐頤指爪長數寸自謂
奉先人之遺體動不敢傷之未幾前自撰廣誌藏之
篋中臨終呼妯至榻前手書遺訓數百言點畫不苟
因誦一日洞然無別體方知不在費工夫之自端坐
而逝其達生委順如此嘉靖丁未始受 冊封趙康
申九月二十四日薨襲爵十有四年距生弘治壬戌
九月十七日辰時得壽五十有九計聞 天子震悼
輟朝遣胡行人維新諭祭 命有司庀喪事賜謚莊

順卹典加隆焉配妃蔡生王在壯年以諸子相繼夭
卽請於安和育弟格子燭於官中撫愛篤至教以義
方燭亦善能承順事王三十年曲盡子道居喪稱孤
稱不肖終始無間可謂慈孝兩得矣薨之明年二月
二十一日辛亥葬於孝友山

谷庶人

谷庶人穗母郭惠妃滁陽王女也生三王長蜀王次
代王次如意王或曰卽谷王也洪武二十六年建邸
宣德卽上谷建文初靖難兵起庶人走還京靖難兵
至穗守金川門登城望見 成祖麾蓋開門迎 成
祖 成祖入卽位 賜穗樂七奏衛士三百及金銀
鈔馬加祿歲二千石官其護衛指揮僉事張興都督
僉事儀衛正張成都指揮使已而改封長沙之國驕
橫尚書茹瑋不謁穗下詔獄死穗益肆無忌造戰船
弓弩器械招匿亡命習兵法戰陣日與都指揮張成

宦者吳智劉信等謀呼成師向父智信國老令公成
智信亦輒應僞作讖書以爲讖有十八云我 高皇
十八子陰傳播惑衆製巧燈上獻擇壯士入朝架燈
又選壯士習音樂與燈並上乘隙爲變奪民田侵公
稅殺無罪人長史盧廷綱屢諫不聽誣磔殺廷綱張
興懼禍及已因奏事北京白其狀 上未信興過南
京啓 太子曰臣冒死聞上 上顧不信臣言臣萬
死願殿下垂聽憶臣言他日得無連坐滅臣家臣死
不朽摠又遣劉信持所爲讖致書蜀王爲隱語曰德
蒼時不可言桓文之事桓文時不可言德蒼之施欲

結蜀王爲援蜀王切責不聽已而蜀王子崇寧王悅
燁得罪父投懋懋納悅燁因詭衆曰往年我開金川
門出建文君建文君今在我宮中我將舉事爲建文
君復辟事將發會蜀王上變告永樂十四年七月
上見蜀王疏歎曰朕待懋厚不宜有此心蜀王忠孝
又不宜欺我張興嘗爲我言我不忍信今果然立命
中官持勅諭懋令懋遣悅燁還蜀懋不意使猝至不
得已就徵十月至京入見上以蜀王章示懋懋頓
首自伏言死罪成國公朱勇都御史劉觀諸大臣廷
劾懋曰周辟管蔡漢戮安長皆大義滅親陛下縱

念穗柰天憲何 上曰穗朕弟朕且令諸兄弟議明
年正月楚王楨等各上議曰穗違 祖訓謀不軌踪
跡甚著大逆無道罪誅不赦 上曰諸王奉大義國
法固爾吾寧生穗二月削穗及其二子賦灼賦煥爵
爲庶人誅諸通謀者與以先發庶人罪狀得不坐

學編

韓王傳

韓王松初封開原洪武二十七年三月 上令王及
藩王省秦晉燕周齊王分道而行至秋八月始還永
樂五年卒葬南京謚憲子狝斌永樂八年嗣二十二
年改國平涼 宣宗初請徙江南不許言居第隘遣
主事毛俊經度并建襄陵樂平二邸及澤州廣福寺
陝西守臣言歲歉 詔止勿建王又言傷廬已撤即
冬寒下力愈難 宣宗令繕王宮罷廣福寺又允王
請蠲護衛三年屯種境內無鹽王請鹽 詔許王易
鹽正統元年上書陳邊防 上褒答正統五年卒謚

恭子範圯正統七年以開城王嗣王九年卒謚懷弟
範抑正統十一年以西鄉王嗣王景泰元年卒謚靖
子徵針景泰元年以高陵王嗣成化五年卒謚惠子
偕沆成化五年以廣安王嗣王十年卒謚悼弟偕滿
成化十二年以彰化王嗣王弘治十四年卒謚康無
子弟之子旭樾弘治十七年以通渭王嗣王嘉靖十
三年卒謚昭子融燧嘉靖十五年嗣請食鹽食茶戶
部言茶易戎馬鹽供邊餉不許世子謀典諸王惟韓
土瘠祿薄人衆甚貧往往凌劫有司平涼知府吳世
良鄺珩任守德王松皆被窘辱旭樾等百五十人至

闡總制尚書嘉靖十五年撫巡黃臣周鈇疏於朝榜

諭禁戢

吾學編

四十四年王卒謚定嫡子謨塤封世

子先卒子朗錡四十五年以鎮國將軍進封世孫隆
慶三年嗣嫡子璟法隆慶四年封世子

繩愆錄

韓恭王翀烱

韓恭王諱翀烱憲王子也憲王始封開原未之國而
薨永樂八年王襲爵二十二年出封平涼平涼北接
邊徼虜衆數充斥境上王習見邊防利害扼腕憤邑
正統元年上書極言時事英廟報曰承諭邊計
至悉足見叔祖惓惓以宗社國家爲心深思遠慮雖

占賢王不是過也賜璽書慰勞并賚金幣正統五年
薨薨後九年而有土木之變

襄陵莊穆王种烱

襄陵莊穆王种烱韓憲王第二子也孝友篤至過人
母季嘗病甚王顧北辰下刲股爲藥藥焉母病頓愈
及母卒毀瘠終喪每當展墓率子孫躬鍤畚以培塚
土恭王之疾也王日視湯液累月不獲治其私家至
或衣不解帶喪極其哀正統己巳虜野先犯順王赴
京師勤王會虜解去璽書勞焉嘗憤虜衆憑陵華
夏成化六年夏上書請率子壻首擊虜報國自効

聖書褒予成化十三年薨壽七十七子範址嗣爵是
爲襄陵恭惠王恭惠亦敏學篤行母荆久罹危疾醫
已束手弗能療恭惠五色無主禱諸神乞以身代遂
刲股和湯進母母竟獲全景泰元年七月事聞 聖
書褒美之恭惠之子徵鈐是爲安穆王安穆之子偕
淵是爲端和王端和之子旭橦是爲懿簡王自莊穆
至於懿簡五世同居言必及義雍雍肅肅皆以孝友
相師嘉靖十一年 上嘉其親睦遣書褒之賚以羊
酒文幣夫人杜氏樂平輔國將軍徵鑑之室也已聘
未婚成化十六年冬徵鑑病卒父母將謀改聘杜自

謂身已許饒貴矣願歸饒家志操甚厲韓康王爲言
於朝乞賜旌表 詔封杜氏爲輔國將軍夫人

漢書

濟王傳

濟王模趙貴妃子洪武二十四年封永樂六年之國潞州宣宗時王言諸子婚請展府府垣外盡民廬也上曰毀民廬以展王府不可令工部往閱繪圖來聞宣德六年卒謚簡子佖焯初封武鄉王宣德八年嗣王景泰中王少子與州官數置酒大會巡撫朱鑑上聞上令諸王非時令萬壽節不得輒會有司飲酒著爲令天順元年卒謚康康王九子長天次幼墀天順三年嗣正德十三年卒謚莊莊王七子長鉉鉉正德十三年以西陽王封世子嗣王嘉靖六年卒

謚恭無子次銓鉢初封靈川王謚恭懿以長孫胤檉
嗣藩王贈藩安王恭王二子長勛壯初封福山王謚
恭和以子胤檉嗣藩王贈藩靖王靖王二子長未名
封次胤檉初管府事後嗣王卒謚懷無子安王銓鉢
四子長勲潛初襲父靈川王卒謚恭格以子胤檉嗣
王贈藩惠王次勲燧勲澈皆鎮國將軍四子未名封
惠王二子長胤移初襲祖靈川王懷王元子嘉靖十
年諸郡王爭嗣王 上冊胤移嗣王胤檉封鎮國將
軍管靈川上府事胤移五子長未名卒次恬燧封世
子

吾學編

二十八年王卒世子恬校三十一年以世子嗣子瑤
堯封世子

繩螫錄

安王傳

安王楹洪武二十五年封平涼永樂十五年卒謚惠
無子國除盡革府寮及樂戶畱典仗校尉百人守園
洪熙初封韓恭王平涼襄陵莊穆王神烱者恭王子
也支封附王國中 英宗令官校隸韓長史供安王
祀暇日給襄陵王使令景泰五年神烱乞承祀安王
正德十二年嗣襄陵王徵鈐遂得請樂戶祀安王明
年樂平王徵鋹援鈐例亦請樂戶禮部言親王有樂
戶郡王別城居者有事假鼓吹有司其附親王國者
假樂戶移長史司因併革安王供祀樂戶嘉靖二年

徵鈴及韓王旭燧又請上以安王故特允徵鈴徵鈴卒韓王融燧又令長史革祀安王樂戶長孫旭檀上言禮樂自天子出韓王不得擅予奪融燧亦言親王郡王禮樂宜有降殺事下撫巡不能決條奏請制曰與樂戶爲安王祀也

五學編

焦太史編輯國朝獻徵錄卷之一